erted by Tiff Combine - (no stamps are applied by registered version)





## المشيح المقيق توني البحث يم

# رصاص في الفلاء

ثلاثة فصول

1941

لانائ ر مكت بتمصيش ۳ شارع كامل شكق-البوالا

دأر مصر للطاباعة سميد جودة السعاد وشركاه



### كتب للمؤلف نشرت باللغة العربية

1987	۱ ــــعمد عَلِيْكُ ( سيرة حوارية )
1988	٢ ــــعودة الروح( رواية )
1988	٣ ـــأهل الكهف( مسرحية )
1988	٤ ـــشهر زاد( مسرحية )
۱۹۳۷	ه ــــيوميات نائب في الأرياف ( رواية )
۱۹۳۸	٦ ـــعصفور من الشرق ( رواية )
1981	۷ _ تحت شمس الفكر ( مقالات )
۱۹۳۸	۸ ـــأشعب( رواية ) ۸
۱۹۳۸	٩ ــعهد الشيطان ( قصص فلسفية )
۱۹۳۸	۱۰ ـــ حماری قال لی ( مقالات )
1989	١١ ـــ براكسا أو مشكلة الحكم ( مسرحية )
1989	١٢ ـــراقصة المعبد( روايات قصيرة )
198.	١٣ ـــ نشيد الأنشاد ( كما في التوراة )
198.	١٤ ـــــــمار الحكيم( رواية )
1981	١٥ ــ سلطان الظلام ( قصص سياسية )
1981	١٦ ــــمن البرج العاجي ( مقالات قصيرة )
1927	١٧ ـــ تحت المصباح الأخضر ( مقالات )
1987	۱۸ ــــــــــــــــــــــــــــــــــــ
1988	١٩ ــ سليمان الحكيم ( مسرحية )
1988	۲۰ ــــزهرة العمر ( سيرة ذاتية ــــرسائل )
1966	7 3.1 - N . 1311 141. 11 - V N

1920	٢٢ ــ شجرة الحكم ( صور سياسية )
1989	٢٣ ـــالملك أوديب ( مسرحية )
190.	٢٤ ـــ مسرح المجتمع ( ٢١ مسرحية )
1904	٢٥ ــ فن الأُدب ( مقالات )
1904	٢٦ ـــعدالة وفن( قصص )٢٦
1905	٢٧ ــــأرنى الله ( قصص فلسفية )
1901	۲۸ ــ عصا الحكيم ( خطرات حوارية )
1901	٢٩ ــ تأملات في السياسة ( فكر )
1909	٣٠ ـــ الأيدى الناعمة ( مسرحية )
1900	٣١ التعادلية (فكر )
1900	۳۲ <u>_ ایزیس (</u> مسرحیة <b>)</b>
1907	٣٣ـــالصفقة ( مسرحية )
1907	٣٤_المسرح المنوع ( ٢١ مسرحية )
1907	٣٥_لِعبةالموت( مسرحية )
1904	٣٦ ـــ أشواك السلام ( مسرحية )
1904	٣٧ ـــرحلة إلى الغد ( مسرحية تنبؤية )
197.	٣٨ ـــ السلطان الحائر ( مسرحية )٣٨
1977.	٣٩ ـــ يا طالع الشجرة ( مسرحية )
1975	٠٤ ـــ الطعام لكل فم ( مسرحية )
1978	٤١ ــــرحلة الربيع والخريف ( شعر )
1978	٤٢ ـــ سجن العمر ( سيرة ذاتية )
1970	٤٣ _ شمس النهار ( مسم حية )

1977	٤٤ ـــ مصير صرصار ( مسرحية )
7771	٥٤ ــــالورطة ( مسرحية )
1977	٤٦ ـــ ليلة الزفاف ( قصص قصيرة )
1977	٤٧ ـــقالبنا المسرحي ( دراسة )
1977	٤٨ ــــ بنك القلق ( رواية مسرحية )
1988	٩٤ ـــ مجلس العدل ( مسرحيات قصيرة )
1981	، ه_رحلة بي <i>ن عصرين</i> ( ذكريا <i>ت</i> )
1971	٥١ ـــ حديث مع الكوكب ( حوار فلسفي )
1971	٥٢ ـــالدنيا رواية هزلية ( مسرحية )
1972	٥٣ ـــ عودة الوعي ( ذكريات سياسية )
1940	٤ ٥ ـــ في طريق عودة الوعي ( ذكريات سياسية )
1940	٥٥_الحمير( مسرحية )
1940	٣٥ـــــــثورة الشباب ( مقالات )
1977	٧٥ ـــ بين الفكر والفن ( مقالات )
7791	٥٨ ـــ أدب الحياة ( مقالات )
1977	٩ ٥ ــــ مختار تفسير القرطبي ( مختار التفسير )
۱۹۸۰	. ٦تحدیات سنة ۲۰۰۰ ( مقالات )
711	٦١ ــــملامح داخلية ( حوار مع المؤلف )
1924	٦٢ ـــالتعادلية مع الإسلام والتعادلية ( فكر فلسفي )
718	٦٣ ـــالأحاديث الأربعة ( فكر ديني )
1984	٦٤ ـــ مصر بين عهدين ( ذكريات )
1910	٦٥ ــ شجرة الحكم السياسي ( ١٩١٩ ــ ١٩٧٩ )

#### كتب للمؤلف نشرت في لغة أجنبية

شهر زاد: ترجم ونشر فی باریس عام ۱۹۳۱ بمقدمة لجور جلکونت عضو الاً کادیمیة الفرنسیة فی دار نشر ( نوفیل أدیسیون لاتین ) وترجم إلی الإنجلیزیة فی دار النشر ( بیلوت ) بلندن ثم فی دار النشر ( کروان ) بنیویورك فی عام ۱۹۶۵ . و بأمریكا دار نشر ( ثری کنتنتزا بریس ) واشنطن ۱۹۸۱ .

عودة الروح: ترجم ونشر بالروسية فى ليننجراد عام ١٩٢٥ وبالفرنسية فى باريس عام ١٩٣٧ فى دار ( فاسكيل ) للنشر وبالإنجليزية فى واشنطن ١٩٨٤ .

يوميات نائب في الأرياف: ترجم ونشر بالفرنسية عام ١٩٣٩ ( طبعة أولى ) وفي عام ١٩٧٤ ( طبعة ثانية ) وفي عام ١٩٧٤ و ١٩٧٨ ( طبعة ثانية ) وفي عام ١٩٧٤ و ١٩٧٨ ( طبعة ثالثة ورابعة وخامسة بدار بلون بباريس ) وترجم ونشر بالعبرية عام ٥٤٩ وترجم ونشر باللغة الإنجليزية في دار ( هارفيل ) للنشر بلندن عام ١٩٤٨ — ترجمة أبا إيبان — ترجم إلى الأسبانية في مدريد عام ١٩٤٨ وترجم ونشر بالألمانية عام ١٩٦١ وبالروسية عام ١٩٦١ .

أهل الكهف: ترجم ونشر بالفرنسية عام ١٩٤٠ بتمهيد تاريخي لجاستون فييت الأستاذ بالكوليج دى فرانس ثم ترجم إلى الإيطالية بروما عام ١٩٤٥ وبميلانو عام ١٩٦٢ وبالأسبانية في مدريد عام ١٩٤٦ . عصفور من الشرق: ترجم ونشر بالفرنسية عام ١٩٤٦ طبعة أولى ، ونشر طبعة ثانية في باريس عام ١٩٦٠ .

عدالة وفن : ترجم ونشر بالفرنسية في باريس بعنوان ( مذكرات قضائي شاعر ) عام ١٩٦١ .

يجماليون : ترجم ونشر بالفرنسية في باريس عام ١٩٥٠ .

الملك أوديب: ترجم ونشر بالفرنسية في باريس عام ١٩٥٠ ، وبالإنجليزيـــة في أمريكـــا بدار نشر ( ثرى كنتنتــــزا بريس )

بواشنطن ۱۹۸۱ .

سليمان الحكيم : ترجم ونشر بالفرنسية فى باريس عام ١٩٥٠ . وبالإنجليزية فى أمريكا بدار نشر (كتتنتزا بريس) بواشنطن ١٩٨١ . نهر الجنون : ترجم ونشر بالفرنسية فى باريس عام ١٩٥٠ .

عرف كيف يموت : ترجم ونشر بالفرنسية في باريس عام ١٩٥٠ .

المخرج : ترجم ونشر بالفرنسية في باريس عام ١٩٥٠

بيت النمل : ترجمه ونشر بالفرنسية في باريس عام ١٩٥٠ . وبالإيطالية في روما عام ١٩٦٢ .

الزمار: ترجم ونشر بالفرنسية في باريس عام ١٩٥٠.

براكسا أو مشكلـة الحكـم : ترجـم ونشر بالفرنسيـة فى باريس عام ١٩٥٠ .

السياسة والسلام: ترجم ونشر بالفرنسية فى باريس عام ١٩٥٠. وبالإنجليزيـــة فى أمريكــــــا بدار نشر ( ثرى كنتنتــــــز بريس ) بواشنطن ١٩٨١.

شمس النهار : ترجم ونشر بالإنجليزية في أمريكا ( ثرى كتتنتز ) واشنطن عام ١٩٨١ .

صلاة الملائكة : ترجم ونشر بالإنجليزية فى أمريكا ( ثرى كنتنتز ) واشنطن عام ١٩٨١ . الطعام لكل فم : ترجم ونشر بالإنجليزية في أمريكا ( ثرى كنتننتز ) واشنطن عام ١٩٨١ .

الأيدى الناعمة: ترجم ونشر بالإنجليزية في أمريكا ( ثرى كنتننتز ) واشنطن عام ١٩٨١ .

شاعر على القمر : ترجم ونشر بالإنجليزية في أمريكا ( ثرى كنتنتز ) واشنطن ١٩٨١ .

الورطة : ترجم ونشر بالإنجليزية فى أمريكا (ثرى كنتننتز) واشنطن عام ١٩٨١ .

الشيطان في خطر: ترجم بالفرنسية في باريس عام ١٩٥٠.

بين يوم وليلـة : ترجـم ونشر بالفرنسيـة فى باريس عام ١٩٥٠ وبالأسبانية فى مدريد عام ١٩٦٣ .

العش الهادئ : ترجم بالفرنسية في باريس عام ١٩٥٤ .

أريد أن أقتل : ترجم ونشر بالفرنسية فى باريس عام ١٩٥٤ .

الساحرة : ترجم ونشر بالفرنسية في باريس عام ١٩٥٣ .

دقت الساعة : ترجم ونشر بالفرنسية في باريس عام ١٩٥٤ .

أنشودة الموت : ترجم ونشر بالإنجليزية فى لندن هاينهان عام ١٩٧٣ وبالأسبانية فى مُدريد عام ١٩٥٣ .

لو عرف الشباب : ترجم ونشر بالفرنسية في باريس عام ١٩٥٤ . الكنز : ترجم ونشر بالفرنسية في باريس عام ١٩٥٤ .

رحلة إلى الغد: ترجم ونشر بالفرنسية فى باريس عام ١٩٦٠. وبالإنجليزية فى أمريكا بدار نشر ( ثرى كنتننتز بريس ) بواشنطن عام ١٩٨١.

الموت والحب : ترجم ونشر بالفرنسية فى باريس عام ١٩٦٠ . السلطان الحائر : ترجم ونشر بالإنجليزية لندن هاينهان عام ١٩٧٣ وبالإيطالية في روما عام ١٩٦٤ .

يا طالع الشجرة: ترجمة دنيس جونسون دافيز ونشر بالإنجليزية في لندن عام ١٩٦٦ في دار نشر أكسفورد يونيفرستي بريس ( الترجمات الفرنسية عن دار نشر « نوفيل إيديسيون لاتين » بباريس ) .

مصير صرصار : ترجمة دنيس جونسون دافيز عام ١٩٧٣ .

مع: كل شيء في مكانه.

السلطان الحائر .

نشيد الموت .

لنفس المترجم عن دار نشر هاينمان ــ لندن .

الشهيد: ترجمة داود بشاى ( بالإنجليزية ) جمع محمدود المنزلاوى تحت عنوان « أدبنا اليوم » مطبوعات الجامعة الأمريكية بالقاهرة ـــ ١٩٦٨ .

محمد عَلِيْكُ ترجمة د . إبراهيم الموجى ١٩٦٤ ( بالإنجليزية ) نشر المجلس الأعلى للشئون الإسلامية . طبعة ثانية مكتبة الآداب ١٩٨٣ . المرأة التي غلبت الشيطان : ترجمة تويليت إلى الألمانية عام ١٩٧٦ ونشر روتن ولوننج ببرلين .

عودة الوعى : ترجمة إنجليزية عام ١٩٧٩ لبيلى ونـدر ونشر دار ماكملان ــ لندن .



## الفصل الأول

( عيادة طبيب.. مكتب الدكتور.. حجرة لها بابان. الدكتور سامي يخلع على عجل المعطف الأبيض، ويرتب هندامه الخارجي بعناية، بعد أن ينظر في ساعة ذهبية في معصمه.. ويسأهب للخروج. . جرس التليفون يدق فوق المكتب...) : ( يجرى على صوت جرس التليفون ) ألو .. أنا الدكتور سامي نفسه ، مين ؟... أهلا وسهلا .. حاضريا فندم . عنوان البيت شارع القصر العيني .. بعد ساعه أكون عندكم .. قبل كده مشغول .. بس خليه ياخذ مسهل .. ( يفتح أحد البابين وهو يصفر بفمه مبتهجا فيصطدم بشخص حسن الهندام داخلا في هياج واضطراب ) بسم الله الرحمن الرحم !.. جرى إيه ؟.. مالك يا نجيب ؟.. : (وهو يلهث يرتمي على أقرب مقعد) اسكت .. أنا

سامي

توفيت !..

سامى : حد قابلك من اياهم .. قلت لك ألف مره اقصر الشر وابعد عن الشوارع اللي يبطلعوا لك فيها أصحاب الديون بالنهار!

نجیب : ( فی صوت متداع و هو مغمض العینین ) مش دیون ..

سامى : أمال إيه الحكايه .. مالك ؟ ما تضيعش وقتى .. أنا لازم أقابل خطيبتى حالا .. ( ينظر فى ساعته ) ..

نجيب : ابعت حالا هات لى واحد حكيم ..

سامی : وأنا يعنى امال هنا طرطور ؟..

نجيب : ( ممددًا على المقعد ) آه يانى ..رحت خلاص مأسوفا على شبابى !..

سامى : اسمع يا نجيب .. إن كان غرضك تتسلبط علشان عايز لك ريال أو نص ريال قل لى بلاش ضياع وقت ..

نجیب : مش مسألة فلوس .. بقول لحضرتك أنا میت .. هو یعنی علشان ما اکون میت لازم یدفنونی فی قرافة المجاورین ؟..

سامى : والكلام المفيد دلوقت إيه بقا ؟..

نجيب : الكلام المفيد اني أنا دلوقت مضروب بالرصاص ..

سامی : ( فی استغراب ) رصاص ؟...

نجيب : انضربت بالرصاص قدام « جروبي » . .

سامى : يا خبر !.. بتقول إيه ؟.. جد يا نجيب ؟.. وساكت ليه من الصبح ؟.. فين ؟.. ( ينادى ) يا عوضين !..

التمرجي مش هنا .. انت لازم لك إسعاف حالا ..

نجيب : أيوه اسعفني ..

سامى : ( يدنو منه و يخلع ملابسه ) اكشف الجرح بسرعة ... دخلت فين الرصاصة ؟..

نجيب : ( يشير إلى قلبه ) هنا !..

سامى : ( فى دهشة ) مش ممكن !..

نجيب : (يشير إلى قلبه بشدة ) بقول لك هنا ..

سامى : مش معقول .. انت يظهر ما عندكش فكره عن

الطب بالمره ..

نجیب : مالیش دعوی بالطب .. أنا بصفتی مضروب رصاصه أقول لك انها واقفه هنا .. وانت حر تصدق والا ما تصدقش ..

سامى : دا القلب يا مغفل .. رصاصه في القلب ولسه

عايش ؟.. انت عايز تطير من عقلي حبة الطب اللي باكل بهم عيش !..

نجيب : ومين قال لك اني لسه عايش ؟...

سامى : بتقول إيه ؟..

نجيب : بلغ عن وفاتى حالا بصفتك حكيم !..

سامى : لازم الرصاصه دخلت في عقلك !..

نجيب : الرصاصه هنا في القلب ..

سامى : ( يجس نبض نجيب ) مفيش حاجه أبدًا عندك .. نقطة

دم مفيش .. النبض طبيعي .. القلب سلم ..

نجیب : القلب سلیم .. سلیم یا جاهل .. افحصنی کویس .. انت شایفنی نجیب بتاع الصبح ؟.. أنا شخص آخر یا سامی من مدة ۷ دقایق ... أنا فی عالم آخر من مدة

۷ دقايق …

سامى : ( ينظر إلى نجيب لحظة ) انت بتحب !..

نجيب : لأول مره في حياتي ..

سامى : كل نوبه تقول دى أول مره فى حياتك ..

نجيب : أبدًا .. المره دى بس .. لأن الرصاصه هنا ..

سامى : رصاصه إيه !..

نجیب : عینیها یا سامی !.. نظره واحده مافیش غیرها !..
عینینا تقابلت عفوًا !.. خلاص .. شعرت فی الحال
بحاجه دخلت هنا .. (یشیر إلی قلبه ) و لا طلعتش ..
لسه موجوده .. هات إیدك .. (یمسك ید سامی)
شوف .. جس ...

سامى : ( يجذب يده ) مين دى ؟.. ما عرفتهاش ؟..

نجیب : أبدًا .. كانت راكبه أتوموبیل طول الأوده دى مره ونص .. وواقفه قدام جروبى تاكل « جلاس » ..

سامى : وانت كنت فين ؟..

نجيب : كنت باخد واحد ويسكى على البار .. واحد بس « أبير ثيف » مفيش غيره .. وانا خارج لقيت عينها في عينى راح قلبى عامل كده .. ( يقبض يده ) وراح ساقط تحت رجلى واتدحسرج فى الشارع على الأسفلت ..

سامى : لغاية ما وقع في بلاعه !..

نجيب : ما اعرفش راح فين ..

سامى : وبعدين ؟..

نجيب : وبعدين شفتها نزلت ومشيت في شارع المناخ في اتجاه

الأوبرا ..

سامي

: مشيت وراها طبعًا ..

نجيب : انت مجنون !.. وانا اقدر امشى فى شارع المناخ ؟.. عايز يقفشوني قدامها وابات الليلة فى القسم ؟..

سامى : أيوه صحيح .. دا من الشوارع الممنوعـه .. مش واخد بالى .. لك فيه على الأقل تلات زباين مـن اياهم .. كوستا الترزى ، وشالوم الجزمجى ، وماريو الحلاق ..

نجيب : ( في حنق ) مسألة الشوارع دى حاجه تجنن .. أروح فين يا ناس ؟.. مفيش شوارع كفايه في مصر .. إن ما كنش مصلحة التنظيم تفتح حالا شوارع جديده والا يعملوا مترو تحت الأرض أو ترمواى في السما .. اللهم أنا خلاص ما ليش عيش في البلد ..

سامى : ( باسما ) انت ممنوع من المرور فى كام شارع ؟.. غيب : ( ناظرا فى أجندته ) أقول لك يا سيدى : خد عندك المدابغ لغاية النص ، وقصر النيل بعد سليمان باشا ، والمناخ جزء منه ، وبعض شارع فؤاد و شارع كوبرى قصر النيل .. وأما الضواحى فصاحب الملك ساكن

في الزيتون ...

سامى : وأخيرًا عملت إيه في حكايتك ؟.. طارت منك ..

نجيب : طبعًا ...

سامى : والنتيجه ؟..

نجيب : النتيجه ؟.. مفيش نتيجه غير انى دلوقت محسوب في عداد الأموات ، وشوف لى طريقه ؛ لأن المسأله جد

مش لعب .

سامى : أشوف لك طريقه ازاى ؟.. ما سألتش مين دى ؟..

بنت مین ؟..

نجيب : أبدًا .. أبدًا ..

سامى : ما شفتش نمرة الأوتوموبيل كام ؟..

نجيب : أبدًا .. أبدًا ..

سامى : طيب تعرف ماركته إيه الأوتوموبيل على الأقل ؟..

نجیب : أبدًا .. أبدًا .. ما اخدتش بالى .. هو انا كنت فاضى أشو ف ماركة الأتوموبيل والا ماركه وشها ..

سامی : وما خدتش تاکسی ورحت وراها تشوف ساکنه

فين ؟..

نجيب : أبدًا .. أبدًا ..

( رصاصة في القلب )

سامى : ادينى عقلك !.. عايزنى أعمل لك إيه بقا بذمتك ؟.. كل حاجه أبدًا .. شارلوك هولمز أنا والاشمهورش ؟.. و الا عايزنى أضرب لك الرمل ؟..

نجيب : انت مستحيل تعرف الحب .. آدى كل اللي اقدر اقوله بالاختصار لواحد مغفل زيك ..

سامی : أشكرك .. أورفوار .. ( يتحرك للخروج ) .. غيب : اسمع .. أنا لأول مره في حياتي اتلخمت .. وبقيت واقف تايه مش حاسس بالدنيا .. وفجأة طلمعت اجرى حاطط إيدى هنا .. ( يشير إلى قلبه ) زى واحد مضروب عيار نارى .. لغاية ما وصلت عيادتك .. تسمى ده إيه ..؟

سامى : أسميه مرستان !..

سامي

نجيب : الحب الحقيقي .. اللي ما يحصلش إلا مره واحده في الحياه !..

: عندها أتومبيل طول الأوده دى مره ونص تمام .. أهو ده الحب الحقيقسى .. هسبانسو .. ريزوتسا .. فراسكينى .. باكار .. ماركه من دول تفتح لك جميع الشوارع الممنوعه ، ولا تحتاجش لمصلحة التنظيم .. نجيب : ( يبصق في الأرض ازدراء ) انت رجل مادى !..

سامى : اسمع يا نجيب نصيحه : أنا اشجعك انك تغوى العربيات اللي طول الأوده دى مره ونص .. ماليتك

تنتظم ، وتعيش مرتاح ..

نجيب : أنا احتقر الكلام اللي بتقوله ده ..

سامی : انت حر ..

نجيب : واحتقر الفلوس ..

سامی : طیب .. أورفوار .. ( **یتحرك** ) ..

نجيب : رايح فين ؟..

سامى : رايح لخطيبتى فى أمر مهم .. وراجع بعد ربع ساعه ... لأن عندى عيانين ...

نجيب : ( يتمدد كالمريض ) أنا عيان ..

سامى : انت قاعد هنا .. أنا رايح بقى .. ( يتجمه إلى الباب ) ..

نجيب : رايح فين ؟...

سامى : مش ضرورى اقول لك ألف مره أنا رايح فين ؟ لأن عقل حضرتك تايه النهارده !..

نجيب : عندى هبوط في القلب ..

سامى : أحسن .. نهارك سعيد .. ( يحاول الخروج ) ..

نجيب : (ينهض على قدميه بسرعة ويصيح به) اقف عندك .. رايح فين ؟.. أنا باقول لك عندى هبوط في القلب يا ابن الكلب .. ومضروب بالرصاص ،

وحالتي خطره ..

سامى : برده حانرجع للرصاص ؟!..

نجيب : ( في صوت قاصف ) شوف لى دوا في الحال لهبوط القبلب والا وشرفك أطرباً العيادة على وعلى العيانين ..

سامي : بقا دا صوت واحد عنده هبوط في القلب ؟!..

نجيب : ( ينزل صوته بسرعة إلى طبقة منخفضة ) انت يا سامي يا خويه عندك دوا عجيب ضد هبوط القلب ..

سامي : إيه هو ؟

نجیب : (یترنم) ورقة بجنیه یا عزیزی ، جنیه مصری والا انجلیزی ، ینحط کده فی الجیب ، یجمبد القلب ویطیب ..

سامى : ( ينظر إليه شررًا لحظة ) بقا اسمع .. يعنى يصح تضيع من وقتى ربع ساعه فى اختراع الحكايه الطويله

العريضه دى علشان كده ؟!..

نجيب : ( يمد يده ) لا أبدا .. مسألة الحب حقيقيه ولا شك فيها ، وبكره تشوف .. أما الجنيه فده من زمان موصوف لى في الحالات الخطره اللي زي دي !..

سامى : ( يخرج محفظة نقوده ) وشرفك أنا لازم اعزل حالا من شقتى اللي فى قصر النيل . . دا مين يسكن فى عماره ساكن فيها انت . .

نجیب : ( یخطف ورقة بجنیه من ید سامی ) هات الله لا یحرمك منی .. ابقی ضیف علی الحساب !..

> سامی : ( فی تهکم ) حساب ؟.. نهارك سعید .. ( یخوج .....)

غيب : ( يضع الورقة في جيبه بعناية ) سعيد مبارك يا افندم .. ( ثم يرتب هندامه ) دلوقت بقا حيث اننا اطمأنينا على مستقبلنا الباهر لمدة ٢٤ ساعه .. يجب البحث عن صاحبتنا اللي عنيها ماركة « بروننج » .. ( يخرج علبة سجاير ويتناول سيجارة ... )

( الباب الآخر للحجرة يطرق .... )

: مين ؟.. ( الطرق يعود فيشتد ) اسكت يا عيـان

الدكتور جاى حالا ..

( الطرق يشتد ... )

سيدة : ( من الخارج تصيح ) أدخل والا لأ ..

نجيب : ( في غير اكترا**ت** ) لأ ..

السيدة : ( من الخارج ) ليه ما ادخلش ؟..

نجيب : كده !..

السيدة : ( صائحة ) لازم ادخل !..

نجيب : ( هو يشعل سيجارته ) ادخلي ..

( الباب الأيمن يفتح وتظهر « فيفى » غادة مصرية أرستقراطية رشيقة جميلة ذات أعين فتاكة وبمجرد أن يراها نجيب يبغت ويبهت وتسقط منه سيجارته من

فمه )

فيفى : فين الدكتور ؟..

( تبحث بعينيها في أنحاء القاعة ... )

نجيب : (بلاحراك) ؟..

فيفى : ( تتأمل جموده فى دهشة ) الدكتور فين ؟..

نجيب : .....

فيفى : الدكتور مش هنا من فضلك ؟...

نجيب : (كأنما كان يخاطب نفسه) مش ممكس .. (ثم يصحو لنفسه ويلتفت بسرعة إلى فيفي ) أفندم ..

فيفي : فين هو ؟..

نجيب : هو مين ؟..

فيفى : ( فى شيء من الصبر النافد والحدة ) الدكتور سامى طبعًا ..

نجيب : آه . . طبعًا . . ما تأخذنيش . . أنا . .

فيفى : ( صائحة فى ضيق عصبى فجمائى ) الدكتــور سامى ...

نجيب : ( في الحال وقد خاف من صيحتها العصبية الفجائية ) ما اعرفوش . .

فيفى : (صائحة فى ضيق عصبى كذلك كالمرة السابقة) انت فى عيادته هنا ما تعرفوش ازاى ؟..

نجيب : ( فى خوف كذلك كالمرة السابقة ) طيب اعرفه !..

فيفى : (تتأمله لحظة من رأسه لقدمه كمن حسبته مخبولا) يعنى، حضرتك ما تقدرش تقول لى إذا كان الدكتور موجود والامش موجود ؟...

نجيب : أقدر اقول لحضرتك ..

فيفى : ( فى تهكم ) إمتى ان شاء الله ؟..

نجيب : حالا إن شاء الله .. بس ..

فيفى : بس إيه ؟..

نجيب : حلم حضرتك على شويه ..

فيفي : ( تنظر إليه في استغراب وضيق ) أنا منتظره ..

نجيب : ( يتمالك ) أيوه يا افسدم .. حضرتك منتظره ..

مين .. ؟

فيفى : ( تنظر إليه نظرة نافد الصبر الذي يحلم لآخر مرة ) منتظره أعرف الدكتور سامي هنا والا لأ ؟..

نجيب : (كمن يفيق) آه .. الدكتور سامى .. آه .. يعنى الدكتور سامى ؟.. أيوه يا افندم أقدر اقــول لحضرتك ..

فيفى : أظن المسألة مش محتاجه للوقت ده كله علشان تقول لى الدكتور هنا والا مش هنا ..

: تحبى أكون صريح شويه ؟..

فيفى : تفضل ..

نجيب

نجيب : أنا محتاج خمس دقايق علشان ارجع لحالتي الطبيعيه ..

فيفى : ( تنظر إليه لحظة ) يعنى دلوقت بأى حال ما تقدرش

تجاوبنى ؟..

نجیب : مستحیل أقدر اجاوب حضرتك على أى سؤال بالشكل ده ..

فيفي : بالشكل ده ازاى ؟..

نجيب : ولو فيها رزالة غمضي عينيك شويه ..

فيفى : ( تنظر إليه شزرًا ) يعنى إيه ؟..

: يعني اعملي كده ..

( يغمض عينيه .... )

فيفى : مش فاهمه ..

نجيب

نجيب : لأ ؛ لازم تفهمي من فضلك ..

فيفى : أفهم إيه ؟..

نجیب : تفهمی إن البروننج فیه ست رصاصات بس .. وانطلقوا كلهم خلاص أكتر من كده يبقى

والطهوا للهم كرس بكور من أول رصاصه .. وإذا كنت سيادتك فاهمه إنى بسبع أرواح أو إنى معجون بالأسمنت المسلح يبقى ظلم .. وانت ما يخلصكيش .. والا انا غلطان في الكلام ده ؟..

( لحظة صمت ... )

فيفى : ( تنظر إليه من رأسه لقدمه كالمرتاب فى عقله ) أنا كنت فاكره الدكتور سامى حكم باطنى بس!..

كنت قا دره الله كتور سامي حكيم باطني بس!..

نجيب : ( فاهما قصدها ) قصد حضرتك إيه بقا ؟..

فيفي : ولا حاجه .. أنا ما قلتش حاجه زياده عن كده ..

نجيب : أولا أنا مش عيان ..

فيفى : طبعًا مش ببطنك ..

نجيب : يعنى سيادتك عايزه تقولي اني عيان بحاجه تانيه ؟..

فيفى : أنا مش عايزه اقول حاجه أبدًا .. ولا فيش داعي لكده بالمره ، لأني مش جايه هنا دلوقت علشان اقول لك

انت عيان بإيه ..

نجيب : أمال حضرتك جايه هنا علشان إيه ؟..

فيفى : جايه بالطبع لشيء تاني .. أقابل الدكتور سامي ..

نجيب : لأسباب صحيه طبعًا ؟..

فیفی : أیوه .. و کمان علشان .. أولا .. اسمح لی أعرف ..

حضرتك مين هنا ؟..

نجیب : حضرتی مین هنا ؟..

فيفى : أيوه لو تسمح لى أعرف ...

نجيب : حاضر .. أقول لحضرتك حالا ..

فيفى : تفضل .. منتظر إيه ؟..

نجيب : ( يخرج علبة سجايسره ويقدمهما إلى فيفسى )

سيجارة ؟..

فيفي : ( بلا حراك ) مرسى .. ما ادخنش ...

نجيب : برافو . عملت طيب قوى . أنا ما احبش الست اللي تدخن

( يتناول سيجارة ويضعها في فمه .... )

فيفي : أنا كإن ما احبش الراجل اللي يدخن ...

نجيب : ( في حركة غريزية ينزع في الحال السيجارة من فمه ويلقى بها على الأرض )

فيفى : ( فى تهكم خفسى ) لأمفيش لسزوم .. اشرب سيجارتك أحسن !..

نجيب : (في قوق) لأ .. مش ممكن .. أنا مجنون ؟!.. خلاص من اللحظه دى بطلت السجاير .. أنا مستعد آتعهد لك وأقسم لك بشرفي وحياة ..

فيفى : ( فى برود ) وإيه الداعى ؟.. دا شيء ما يهمنيش ... نجيب : ( مصدوما ) ما يهمكيش انى ابطل السجاير ؟..

فيفى : بالتأكيد لأ .. يهمني في إيه ؟..

نجيب : مش لما ابطل السجاير صحتى تتحسن ...

فيفي : وانا مالي ؟... دا شيء يهمك انت ..

نجيب : يهمني انا بس ؟ . . ما يهمش حد تاني أبدًا ؟ . . .

فيفي : ما اعرفش .. انت بالطبع أدرى بظروفك ..

نجيب : إن كان على ظروفى تأكدى إنها ألعن ظروف خلقها ربنا ، أولا أنا مقطوع من شجره ولا فيش حديهتم ان كنت ادخن ولا انحرق .. ثانيا ، أنا ساكن لوحدى في « أبارتمان » في شارع قصر النيل .. ومحمد السفرجي سابني امبارح وطفش .. ووالدى الله يرحمه ويحسن إليه وكذلك والدتى الله يرحمها ويحسن إليها ، كانوا الاثنين من خيار الناس ، وكان عندهم ..

فيفى : ( تقاطعه وتلتفت جهة الباب ) مع الأسف : عوضين التمرجي مش هنا علشان اسأله عن الدكتور سامي !..

نجیب : ( مصدوما ) حضرتك متضایقه للدرجه دی من کلامی ؟..

فیفی : (فی تودد) لأ .. إنما بس أنا شایفه الـوقت غیر مناسب علشان تحکی لی تاریخ حیاتك ...

نجيب : وإمتى امال تشوفي الوقت مناسب علشان ابقى احكى لك تاريخ حياتي بالتفصيل ؟..

فيفى : وإيه الضروره انك تحكى لى تاريخ حياتك بتفصيل أو من غير تفصيل ؟

نجيب : مفيش ضروره أبدًا ؟..

فيفى : بالتأكيد مفيش أبدًا ..

نجيب : إيه السبب ؟..

فيفى : طبعًا .. أو لا أنا .. ما تأخذنيش .. ما اعرفكش ..

نجيب : (مصدومًا) أشكرك ..

فيفى : لأ .. ما تشكرنيش .. دى الحقيقه ..

نجیب : صحیح دی الحقیقه .. لکن ..

فيفي : لكن إيه ؟..

نجیب : لکن برده ما کنتش احب انك انت اللي تذكريني

.. له.

فیفی : أنا مضطره ...

نجيب : ( يطرق في شبه إذعان وألم ) طيب ..

فيفى : ( تنظر إليه في صمت ثم تقول ) إنت مع ذلك لغاية

دلوقت ما فهمتنيش حضرتك تبقى مين هنا ؟..

نجيب : ( في كآبة ) وإيه الفايده ؟!..

فيفى : بس أحب اعرف أنا بكلم مين ..

نجيب : بتكلمي مين ؟.. بتكلمي شخص مخلوق جديد لنج

من مده ۱۰ دقایق .. ما لوش مستقبل .. ما لوش غیر

حاضر جميل يدوم كان بالكتير ٥ دقائق ..

فيفى : مش فاهمه كلامك ..

نجيب : أحسن ..

فيفي : بدى أعرف بس أنت صفتك إيه في العياده ؟..

نجيب: ماليش صفه ..

فيفي : انت لك صله بالدكتور سامي ؟..

نجيب : صاحبي ..

فيفي : حكم زيه طبعًا ؟..

نجيب : (شاردا) طبعًا ..

فيفى : ( باسمة ) الطيور على أشكالها تقع ..

نجيب : ( كمن يخاطب نفسه ) صحيح أنا وقعت ؟..

فيفى : بالتأكيد ..

نجيب : ( يرفع رأسه ويلتفت إليها فجأة ) إيش عرفك ؟..

فيفى : أنا أعرف انك ما وقعتش على الدكتور سامي هنا

إلا النهارده ، لأني سبق جيت له كتير في الوقت ده ...

نجيب : سبق جيتي كتير هنا قبل النهارده ؟.. وانا كنت ساعتها

في أنهى داهيه ؟..

فيفى : ما اعرفش ..

فيفي

نجيب : ( صائحًا ) اسمحى لى أقول لك انى انا إنسان يستحق

الضرب بعشرين أو خمسة وعشرين صرمه نضيفه !..

: ما قدرش اقول لك بالضبط انت تستحق كام .. لكن كل اللي اقدر اقوله انك بتضيع وقتى بشكل غريب .

المهم فى كل اللى فات الدكتور سامى هنا والا مش هنا ؟..

نجيب : ( مصدوم منفعل ) الدكتور سامي مش موجود .. دا كل اللي اقدر اقوله .. وعشان ما اضيعش وقت حضرتك بشكل غريب أقول لك أورفوار ، أو ... آديو ...

( يتحرك .....)

فيفى : فيه عيانين بره منتظرين الدكتسور .. مين رايح يشوفهم ؟..

نجيب : ما اعرفش ...

فيفي : الدكتور سامي ما قالش مين يشوف العيانين ؟..

نجيب : مفيش هنا عيانين ..

فىفى : فيه . .

نجيب : مفيش ...

فيفى : فيه ..

نجيب : مفيش ...

فيفي : بقول لك فيه بره في الصاله وفي أودة الانتظار ..

نجيب : بقول لك مفيش هنا عيانين ...

فیفی : طیب روح شوف بعینك بره !..

نجيب : أنا ما اكدبش نفسى واصدق عينى .. مفيش في العياده بل في العالم كله دلوقت غير شخص واحد بس

القدر اعترف بصحيح انه عيان ..

فیفی : مین هو ؟..

نجيب : المخلوق اللي واقف قدامك ...

فيفى : إنت بتقول انك حكيم مش عيان ..

نجيب : عيان ..

فيفى : مش باين عليك ..

نجیب : هو یعنی علشان ما اکون عیان لازم بشیلونی علی

نقالة !..

فيفى : وعيان بإيه ؟..

نجيب : وأنا مجنون اقول لك أنا عيان بإيه ، وحساس بإيه ؟..

مستحيل اقول ، ولو شنقوني ..

فيفى : ليه بقا ؟..

ُ نجيب : كده .. ما اقولش أبدًا ..

( لحظة صمت ....)

فيفى : ( تنظر إليه قليلا ) أحسن .. برده ما تقولش ...

نجیب : أنا نفسی ما یمکنش اقول ..

فيفى : أيوه ما تقولش ..

نجيب : ما اقولش أبدًا ..

فيفى : أيوه كده ..

نجيب : أيوه ...

فيفى : أرجع للموضوع .. الدكتور سامى ما قالش حايرجع .. هنا إمتى ؟..

نجيب : أؤكد لك لو قلت لك أنا عيان بإيه مستحيل تصدق ..

فيفي : قلت لك خلاص ما تقولش .. انتهينا ..

( رصاصة في القلب )

نجيب : علشان كده ما يمكنش اقول ..

فيفى : ما تقولش ..

نجيب : أيوه ما اقولش ..

فيفى : أيوه كده ...

نجيب : أيوه ...

فيفى : إذا كان الدكتور سامى مش راجع دلوقت أقدر اسيب

له كلمه .. ( فجأة تضع يدها على ضرسها متألمة )

اه ..

نجيب : ( في لهفة ) مالك ؟..

فیفی : ( تخرج مندیلها و تضعه علی فمها ) سنتی ..

نجيب : ( في اهتمام وقلق ) بتوجعك ؟؟..

فيفى : قوى ...

نجيب : ( يهرول في الحجرة كأنه يبحث عن شيء ) فين ؟.. فين ؟..

فيفي : بتبحث عن إيه هناك ؟.. سنتي هنا ..

( تشير إلى فمها ... )

نجيب : أيوه فاهم .. أنا ببحث عن الدوا .. فين الدوا .. أو لا ايه هو الدوا بالضبط .. على كل حال أنا لازم اشوف

لك طريقه .. لأنى مقدرش اشوفك متألمة من أى شيء .. فين التمرجى ؟.. فين الدكتور ؟.. إنت لازم لك واحد دكتور حالا ...

فيفي : إنت مش بتقول انك دكتور ؟..

نجيب : آه .. أيوه برضه .. لكن حتى على فرض انى دكتور

ما اقدرش أعالجك انت ..

فیفی : لیه ؟..

نجيب : مقدرش اقول لك ليه .. المهم دلوقت إيه اللي في إمكاني أعمله علشانك ؟!.. سنتك بتوجـعك قوى ؟..

فيفي : أيوه .. دلوقت بس وجعتني مش عارفه ليه ؟..

غيب : ورينى ، افتحى بقك .. فين السنه دى ..؟ ( تفتح فمها فتظهر أسنانها ) أولا ده ضرس مش سنه .. علمان تصدق انى دكتور .. ثانيا فين هــى الاسنان ؟.. أنا مش شايف غير صفين لولى مـن الغالى !!.. إنت يلزمك واحد جواهرجى مش واحد حكم ..

فيفي : لأ ... أرجوك .. ضرسي بيوجعني .. شوف لي أي

علاج حالا ..

نجيب: علاج زي إيه ؟..

فيفي : مش أنا طبعا اللي اقول لك ..

نجيب : أصل انا بس مش حكيم اسنان . .

فيفي : أمال حكيم إيه ؟..

نجيب : ( في تردد ) حكيم .. ( ينظر إلى عينيها الساحرتين ) عيون .. أيوه أنا حكيم عيون .. لأنى أفهم في العيون .. وقاسيت من العيون ..

فيفى : لكن احنا دلوقت فى الاسنــان .. واللى بيوجعنـــى ضرسى ..

نجيب : تأكدى إن ضرسك عزيز على قوى .. لكن بقا مع الأسف ..

فيفى : اسمع يا دكتور .. أنا اعرف إن الألم دايما جاى من عصب الضرس لما الواحد ياكل حاجة متلجه .. ولذلك أى مسكن بسيط ..

نجيب : (بسرعة )أيوه مسكن .. عليك نور .. أهو ده الدوا اللازم .. بس كان تايه عن بالى .. إنما بقى المسكن ده يعنى الواحد يتعاطاه سفوف ، والا معلقة شوربه قبل

الأكل ، والا إيه ..؟

فيفى : ( تنظر إليه مليا ) إنت يظهر انك مش دكتور أبدًا . .

نجيب : د كتور في العيون بس يا افندم ..

فيفى : ولا حتى في العيون ...

نجيب : الله يسامحك .. المهم عندى ان ألمك يزول بأى

طریقه .. أنا مصرح لك : اشتمینی .. اضربینی .. أنا افتكر ان أحسن مسكن هو انك تشغلی نفسك عن

الألم ببهدلتی ولعن أبو خاشی .. أظن دی أحسن طریقه ..

فیفی: لکن ده مش علاج طبی ..

نجيب : مش ضرورى العلاج يكون طبى .. مش أنا حكيم .. لكن أؤكد ان البلاوى التقيله ما تجيش الا من تحت

راس الحكما ..

فيفى : ( فى سخرية ) إنت حكيم مدهش ا..

نجيب : جايز .. إنما الأصح انى بنى آدم متأ لم دلوقت بشكل

مدهش ..

فيفى نصل باين عليك أبدًا ..

نجيب : ما هو برده ، ده من سوء حظيم ..

فیفی : ومع ذلك كونك انت كان متأ لم دا شيء ما يهمنيش . .

نجيب : وانت إيه اللي بيهمك ؟!..

فيفي : المهم عندي حاجه تسكن ضرسي ..

نجيب: ضرسك لسه يوجعك ؟...

فيفى : إيوه ..

نجيب : خالص ؟...

فيفى : خالص ..

نُجيب : أحسن ..

فيفي : إزاى أحسن ؟..

نجیب : علشان تانی مره تحرمی الوقوف قدام جروبی تاکلی

« جلاس » .. توجعي ضرسك وتموتى الناس !..

فیفی : ( فی دهشة ) وعرفت ازای انی أكلت جلاس قدام

جروبی ؟..

نجيب : حاجه بسيطه ..

فیفی : لازم شفتنی قبل دلوقت بشویه ...

نجيب : لأ . . `

فیفی : أمال عرفت ازای ؟..

نجيب : ما تعرفيش اني أقدر أقرا كل شيء في فكسرك وفي

ضميرك في قلبك ؟..

فيفي : حكيم روحاني حضرتك ؟..

نجيب: بالضبط!..

فيفى : ( فى تهكم ) أظن زى ما انت حكيم عيون ؟..

نجيب : أحسن شويه ..

فيفى : طيب اقرا اللي في ضميري ..

نجيب : (يقف وقفة صناعية وينظر إليها مليا ثم يتنحنح) في

ضميرك اني شخص ضيع وقتك بشكل غريب ..

فیفی : کداب ..

نجيب : (في فرح) صحيح ؟..

فيفى : ما تسألنيش .. العالم الروحانى الحقيقى ما يسألش الزبون .

نجیب : بدی اطمئن ..

فيفى : مش من وظيفتك انك انت اللي تطمئن يـا حضرة الساحر العجيب ..

نجيب : أو كد لك إنك ألطف إنسانه شفتها ..

فيفي : أنا مش عاوزه تقرا لى اللي في ضميرك انت !..

نجيب : عندك حق . . اللي في ضميري أنا مفهوم طبعًا . .

وسحرك انت بس اللي قدر يكشف ضميرى ..

فيفي : إحنا في سحرك انت !..

نجيب : (فرحا) وأنالي سحر ؟!...

فيفى : إنت اللَّى بتقول ..

نجيب : ( **متذكر**ا ) آه ..

فيفى : قريت إيه كان في فكرى ؟..

نجيب : ( ناظرا إليها مليا ) إنت مدهشه !..

فیفی : دا شیء مش فی فکری طبعا ..

نجيب : انت مش بسيطه أبدا ..

فيفى : ومين بسيط في الزمن ده ؟..

نجيب : أنا بقرا في قلبك كلام يخوف . .

فيفي : يخوف ليه ؟.. ويخوف مين ؟..

نجيب : يخوفني ...

فيفى : يخوفك انت ؟.. إنت كل حاجه تحشر نفسك فيها ؛

حتى قلبى ؟..

نجيب : يا ريت أقدر انحشر في قلبك ؟..

فيفى : ( تبتسم ) إيه بقى اللي خوفك ؟..

نجيب : أولا بصيت في قلبك لقيته فاضي ، أفضى من جيب

نجيب من قبل عشر دقايق !..

فيفى : كداب ..

نجیب : إزای ؟!.. قلبك مش فاضی ؟..

فيفي : لأ ..

نجيب : مشغول ؟..

فيفي : طبعا ..

نجيب : ( فى فرح ) كويس .. تسمحى لى بقا أسألك سؤال واحد ؟..

فيفى : ( فى تقطيب ) أنا عارفه السؤال الواحد ده ، وما اسمحش به أبدًا ..

نجيب : لأ .. إعملي معروف أنا محسوبك ، متجيش لغاية النقطه الحساسه وتعاكسيني .. كلمه واحده يتوقف عليها مستقبل حياتي ..

فيفى : كلمة إيه ؟..

نجيب : مين هو ..؟ مين هو السعيد اللي ...؟

فيفى : مستحيل .. يظهر إنى تساهلت معك فى الكلام أكتر من السلازم .. عاوز كان تعسرف أسرارى الخصوصيه ؟!..

نجيب : وماله ؟.. إنت أولا أجمل وأذكى وأشجع آنسه مصريه عرفتها ..

فيفى : مش عاوزه تقريظ من فضلك ..

نجيب : تقريظ ؟.. دى حقائق .. أنا عاوز اقول لك انك زى ما ظهر لى واحده مش بسيطه من بتوع زمان .. إنت واحده فاهمه كل شيء في الدنيا .. تعليم ، وتهذيب ، وذكاء .. بالطبع دى أكبر قوة وأعظم سلاح في يد الست تقدر تعيش به في وسط العفاريت .. إيه اللي يهم واحده زيك دلوقت انها تكون صريحه مع واحد زيي !..

فيفى : ما تبلفنيش من فضلك ..

نجيب : مش بلف أبدًا والله ..

فيفى : عاوزنى أكون صريحه في إيه ؟..

نجیب : أولا أنا مش عاوز أعرف إنت مین .. ولا ماركة أتوموبيلك إيه .. ولا ساكنه فين !..

فيفى : أمال عاوز إيه ؟..

نجيب : عـاوز اعـرف بكـل صراحـه .. فـاهمه ؟.. بكــل صراحه ، مين هو المخلوق اللي شاغل قلبك ؟..

فيفي : واحد من الناس ..

نجیب : مفهوم ، قصدی مین هو یعنی ؟...

فيفي : وإيه يهمك إن كان زيد والا عمرو ؟..

نجیب : ( فی تردد ) هو موجود ؟..

فيفي : طبعًا على قيد الحياه ...

نجیب : ( مترددًا ) لأ .. قصدی موجود .. هنا ؟..

فيفي : أيوه .. موجود في مصر ..

نجیب : (خائفًا) قصدی کان یعنی .. بس جاوبینی بالصراحه .. فاهمه ؟.. بکل صراحه « هو موجود

هنا في الأوده دي والا لأ ؟..

فيفى : ( مندهشة ) سؤال غريب ؟..

نجيب : عاوز الصراحه .. هو موجود قدامك دلوقت والا لأ 9...

فيفى : طبعًا لأ ..

نجيب : ( يحاول الهدوء ) آه ..

فيفى : ( تلاحظ تغيره ) ما لك ؟..

نجیب : لأ .. مفیش حاجه أبدًا .. یعنی قصدك انه واحد تانی .. مش موجود هنا ؟..

فيفي : طبعًا ..

نجيب : (يطرق) آه ..

فيفى : ( **تنظر إليه** ) زعلت ؟..

نجيب : ( يرفع رأسه ) لأ .. ما فيش زعل أبدًا ..

فیفی : أظن أنا جاوبتك بصراحه زی انت ما طلبت تمام ؟..

نجيب : ( في إطراق ) أيوه .. تمام .. مرسى ...

فيفى : أقدر أقول لك كمان إذا كنت عاوز إيضاح أكتر من

كده إنه خطيبي ..

نجيب : مش مهم ..

فيفى : وإنه حكيم زيك ، لكن يمكن يعرف صنعته أحسن

منك شويه ..

نجيب : طبعًا ..

فيفى : أقدر أقول لك إنك يمكن تعرفه ..

نجيب : جايز ..

فيفى : وإنه ربما يكون صاحبك ..

نجیب : زی بعضه ..

فيفى : تستعلم عن حاجه تانية كان ؟..

نجيب : لأ .. خلاص متشكر .. ده كل اللي انا كنت عاوز

اعرفه .. نهارك سعيد ..

(ينحنى ويتناول سيجارته التى ألقاها على الأرض ويسحها فى كمه ويضعها فى فمه .. صمت طويل . )

نجيب : نهارك سعيد ...

(يتجه إلى الباب ليخرج ......)

فيفى : ( تنظر إليه بـاسمة ، وعندئـذ تتحـرك نحو البــاب الآخر ) يا عوضين !..

( تخرج .... )

نجيب : ( لا يزال يفكر ) ..

سامى : ( داخلا من الباب الواقف أمامه نجيب ) إنت لسه هنا .. لسه هنا ومعاك جنيه ؟!.. مارحتش ليه تبحث

عن صاحبتك ..

نجيب : (ينظر إليه ولا يجيب ...)

سامى : (يترك نجيب ويهرع باحثا ) فيفى .. (لنجيب )

فیفی خطیبتی هنا .. ما شفتهاش ؟..

فیفی : ( **تدخل** ) سامی ا...

سامي : أنا يظهر رحت لك من هنا ، وانت جيتي من هنا ..

تعالى أولا لما اقدم لك نجيب صاحبى وصديقى وجارى في السكن ( يقدم أحدهما للآخر ) ..

فيفي : (بتهكم) تشرفنا ..

نجيب : ( لا يجسر على النظر إليها ) تشرفنا يا افندم ..

فيفي : حضرته طبعًا حكيم زيك يا سامي ..

سامی : أبدا .. ده موظف مهم ...

فيفى : ( لنجيب فى تهكم ) كده ؟!..

سامى : وفضلا عن ذلك معروف فى كل مكان إنه من أظرف شخصيات البلد ، ما يغركيش انه واقف كده مبلم زى اللي خطفوا محفظته .. ده بس علشان حصلت له

حادثه من مدة نصف ساعه ...

فيفى : حادثة إيه لا سمح الله ؟..

سامى : شاف واحده فى أتومبيل قدام جروبى بتاكل جلاس ..

نجيب : ( بسرعة ) قصدى حادثة أتومبيل .. كان حا يحصل

تصادم ..

سامى : بلاش كدب يا نجيب ..

فيفي : وجرى إيه ؟..

سامى : ما فيش تصادم ولا حاجه .. الحكايـه كلهـا إنــه

يىحب ..

نحيب : ( في حيرة ) كلام إيه ده يا سامي

سامى : فيفى « سبور » ما تخفش .. هو الحب عيب ؟.. مش

كده يا فيفي ؟ . . بدليل اننا حبينا بعض . .

فیفی : طبعًا یا سامی ..

نجيب : (يدير وجهه ويتحرك ) نهاركم سعيد !..

سامى : الله .. انتظر .. قل لنا نويت على إيه .. احنا لازم نساعدك ونشوف لك طريقه .. ما دمت أول ما

نساعدك ونشوف لك طريقه .. ما دمت اول ما شفتها اتلخمت وغرقت في شبر ميه ولا عرفتش هي مين ولا ساكنه فين ؟.. فأظن مش لطيفه اننا نسيبك كده وحلان لشوشتك ..

: أرجوك يا سامي تريح نفسك من جهتي !..

سامى : إنت مكسوف تقول انك بتحب ؟..

نجيب : وبعدين معاك ؟!..

نجيب

سامى : إنت مش قايل لى أبلغ عن وفاتك ؛ لأن عينيها قتلتك ومت خلاص وانضربت بالرصاص ، ولا تقدرش تعيش من غيرها .. حصل والا ما حصلش ؟..

فيفي : للدرجة دى ؟..

نجيب : كلام ..

فيفى : طبعا كلام !...

نجيب : والدليل على كده إنى عايش أهوه كويس بصحه جيده

أربعه وعشرين قيراط ..

فيفي : دا من حسن الحظ ..

سامى : (وهو يخلع جاكتته ويرتـدى معطـف العمــل)

ما تصدقیش .. شوفی و شه أصفر ازای ؟.. أنا اراهن إن ما كان و زنه نزل النص ..

نجیب : (صائحا) یا سیدی ما لکش دعوی بوزنی اعمل معروف !.. انت حد مسلطك علی النهارده ؟!..

سامى : شوف انت بقيت عصبى ازاى ؟.. مــا يصحش توصل حالتك للدرجه دى واسيبك ..

نجیب : وعاوز منی إیه بقا انت دلوقت ؟...

سامى : أشوف لك طريقه حالا .. أنا كنت الأول مستعجل ودلوقت فضيت لك .. اسمع : أحسن حـــل انك

تروح ( جروبی » وتسأل .. : أسأل عن إيه ؟..

نجيب

سامى : عن الست صاحبة الأتومبيل الفخم اللي كانت بتاكل

جلاس يمكن تكون معروفه هناك ..

نجيب : طيب وان عرفتها يجرى إيه فى الدنيا ؟.. إيه اللي راح يتغير فى حياتى ؟..

سامى : إيه التغفيل ده ؟.. إن عرفتها تبقى خلاص المسأله انحلت ، تبقى نجحت يا عزيزى واهنيك واستحق منك الحلاوه مش كده والا إيه يا فيفى ؟..

فيفى : ( باسمة ) بالتأكيد !..

نجيب : (خافتا وهو ينظر إليها ) شيء غريب !..

سامى : يلله طيران على جروبى .. ما تضيعش دقيقه واحده !..

نجيب : ( يتحرك ) حاضر .. نهار كم سعيد ..

سامى : (بسرعة) انتظر يا نجيب (يدنو منه ويهمس إليه) .. اسمع ... انت مش لازم لك كان فلوس ؟..

نجيب : لأ ..

سامى : عجيبه !... لأول مره فى حياتك الفلـوس مش لازماك !..

نجیب : (یخوج الجنیه من جیبه) حــد .. ده کان مش لازمنی ..

( رصاصة في القلب )

سامى : ( فى دهشة ) مش ممكن !..

نجيب : ( يعطيه الجنيه ) لأول مره في حياتي أسلف فلوس!..

سامى : قصدك .. ترد السلف ..

نجيب

نجيب : الاثنين واحد نهارك سعيد ..

سامى : اسمع .. ورايح تقابلها ازاى وانت ما معكش فلوس ..

: ( صائحا ) أقابل مين ؟.. مين هي اللي اقابلها ؟..

ما تقولش الكلام ده بقا أحسن ما يحصلكش طيب ..

أنا مش مقابل حد أبدًا .. سيبنى اعمل معروف بقا خليني اروح لأشغالي .. أنا واحد عندي شغل في

الوزاره .. وانت النهارده ضيعت وقتى النفيس !..

سامى : وقتك النفيس ( يلتفت إلى فيفي ) بقول لك أصبح

عصبى .. ما كانش كده أبدًا ..

فیفی : ( لنجیب فی تهکم خفی ) اشرب فنجان ینسون دافی یا نجیب بك

ی جیب بت

نجيب : (ينحنى) أشكرك !..

سامى : صحيح .. الينسون الدافى ده مدهش ..

نجیب : حاضر !.. حاشرب ینسون دافی ..

فيفى : وحمام سخن قبل النوم ..

نجيب : حاضر ..

سامى : صحيح الحمام السخن قبل النوم مدهش ..

نجيب : آخد حمام سخن !..

فيفي : وخد بعد كده ..

نجيب : إيه تاني .. دش بـارد كان ؟!.. اعملـوا معـروف

كفايه .. اسمحو لى أروح لحالى.

فيفي : « الباكار » بتاعتي تحت تقدر توصلك ..

نجیب : ممنون .. أنا ما اركبش لا باكار ولا دوكار ..

سامی : سیبیه یمشی علی رجلیه .. ودا وش نعمه ؟..

فيفى : علشان أظن البك مستعجل .. احنا يظهر ضيعنا

وقتك النفيس يا نجيب بك ؟!..

نجيب : بشكل غريب !..

سامى : ( يلتفت إليه مقطبا ) ازاى ؟..

نجیب : (صائحًا منفجرًا) أقسم بالله العظیم لو تکلمت کلمه زیاده ، لأطرباً علیك العیاده وزی ما بترسی .. أنا لا قابلت ست فی جروبی بتاكل جـــلاس ولا سم

هارى .. والحكايه ملفقه من أولها لآخرها علشان

ألطش منك جنيه .. ولو اسمعك تجيب لي سيرة الست

دى مره تانيه أنا اضربك بالرصاص !..

سامي: الرصاص إياه اللي انضربت به النهارده ؟!..

نجيب : أنا باكلمك جد .. وانت الجاني على نفسك ..

سامي : انت جرى لك إيه يا نجيب ..؟

نجيب : أنا متأسف أكلمك باللهجه دى قدام الست .. لكن

أنا مضطر « لفيفي » ما تأخذنيش !..

فيفي : ( باسمة ) خدراحتك في الكلام ..

سامي

: معذور !.. أنا مش قادر أفهم يا نجيب ازاى تياس للدرجه دى ؟.. احنا نبحث لك عنها يا سيدى من تحت الأرض .. بس اهدا وروق دمك وكون مطمئن .. دى مسأله فى غاية البساطه .. أنا أتعهد لك وأكون مسئول ..

نجیب : أصل المصیبه انك ما بتفهمش عربی أبدًا .. دماغك متركبه شمال .. أعمل لك إیه ؟.. الأمر وما فیه یا سیدنا الافندی إن حكایه مالهاش أساس بالمره . فهمت كلامی ؟.. یعنی لا كان فیه ست ، ولا جلاس ، ولا أتوموبیل ..

سامى : مفهوم .. لأنك ضيعت ده كله بلخمتك ..

نجيب : ما فيش فايده !..

سامى : لأنك انت لما تحب ..

نجيب : ( مقاطعًا ) قلت لحضرتك ما فيش حب ! . .

سامى : كده ؟!...

نجيب : تصدق ما تصدقش انت حر .. أولا أنا ما اقدرش

ادخل جروبي ، لأن مرسيل اللي واقف على البار له في

ذمتی ۲۰ جنیه من حساب وغیره ..

سامى : حتى البارمان اللي واقف على البار ؟.. والله انت لو

دخلوك الجنه برده تستلف من سيدنــا رضوان اللي

واقف على الباب !..`

نجیب : ما حدش له یی شأن ..

فيفى : طبعًا ما لناش شأن أبدًا ..

نجيب : على كل حال . . يكون في معلومك اني ما احبش الست

اللي كانت بتاكل جلاس قدام جروبي.. ما احبهاش..

أنا حر. ما احبهاش أبدا. حد شريكي؟ . بالعكس . .

أنا اكرهها دلوقت زي ما اكره فاتورة الحساب!..

فاهمين .. ما احبهاش .. ما احبهاش ..

سامي : أقطع دراعي ان ما كان ده هو الحب ..

فيفى : (ضاحكة وتقول بصوت خافت) مسكين يا نجيب !..

## الفصل الثاني

(الشقة التي يسكنها نجيب بشارع قصر النيل: صالون بسيط حسن المذوق .. باب في الصدر وباب في الجهة اليمنسي صغير، وباب بلكون في الجهة اليسرى.. منضدة كبيرة على شكل صندوق في وسط الصالون .. وعليها غطاء فلا يدرك الرائي لأول وهلة أنها صندوق .. تليفون على منضدة أخرى صغيرة وجراموفون على منضدة ثالثة ، كذلك مرآة في الحائط ..)

: (أمام المرآة بالقميص والبنطلون يربط الكرافتة .. يدق جرس باب الشقة .. فينتفض نجيب ويسرع إلى وسط الصالون ) .. جرس الخطر !.. ( يتجه إلى المنضدة التي كالصندوق ويرفع غطاءها ، فيفتح الصندوق فيدخل فيه ويتمدد ، ويغلق عليمه الغطاء ... وعندئذ يدخل عبد الله من باب الصدر )

عبد الله : ( فى يده ورقه ) سى نجيب بك !.. يساسى نجيب بك الله .. اظهر جنابك وبان وعليك الأمان !.. مفيش حد من اياهم .. دا انا عبد الله البواب ...

نجيب : (يرفع الغطاء ويظهر من الصندوق ويظل لحظة يرمى عبد الله بنظرات شزراء ثم ينفجر ) انت مش عبد الله البواب ، انت عبد الله الجحش .. حضرتك مش ناوى تبطل اللعب في جرس الخطر ؟..

عبد الله : نسيت ..

نجیب : یعجبك كده تخلی دمی یهرب من غیر مناسبه ؟..

عبد الله : حصل خير ..

نجيب : ( يرتمى على المقعد ) إجرى بقى شوف لى كباية لمون بالتلج ..

عبد الله : وفين هو اللمون والتلج ؟..

نجیب : تصرف یا أخی .. بس شاطر تعکر مزاجی .. شیء

يجنن ..

عبد الله : هات جنابك قرش نشترى به ..

نجيب : يتقول إيه ؟..

عبد الله : قرش . .

نجيب : اسحب كلمتك بسرعه ..

عبد الله : ما فيش حد دلوقت راضي يبيع لنا شكك ..

نجيب : طيب خلاص اسكت .. صرفنا نظر .. لكن الحق مش عليك .. الحق على أنا اللي اسكن في عماره فيها بواب نتن زى حضرتك .. طول عمر البوابين تسلف السكان ، وانت راضى تطلع من جيبك قرش واحد نجيب به تلج ..

عبد الله : تصدق يالله يا سي نجيب بك ؟..

نجيب : مصدق بالله انك بارد ..

عبد الله : أبدا .. وشرفك لو تعرف العذر .. دا انا مخصوص طالع لجنابك علشان أطلب ..

نجیب : لأ .. اقصر الشر .. تطلب إیه ؟.. انت انهبلت ؟.. اسکت بقا خلاص .. لا تطلب منی ولا اطلب منک .. خلینا کده حافظین مراکزنا .

عبد الله : أنا على كل حال ما انساش فضلك على ..

نجيب : أيوه كده اتصلح اعمل معروف ..

( يتناول الجاكتة من على مقعد ويلبسها ... )

عبد الله : بس ..

عبد الله

نجیب : (یقاطعه) لأ .. فی عرضك ما فیش بس !.. ما تبیب تبقاش زی القطط تاكل و تنكر .. انت لسه امبارح واصلك منی نص ریال ..

عبد الله : خليهم النهارده ريال ..

نجیب : وأجیب لك منین ؟.. هو انت ربنا مشیعك دلوقت علشان تتسبب في نكدى ؟..

عبد الله : دا انا یا بیه حایش عنك بلاوی کتیر ..

نجيب : طيب ما تحوش نفسك عنى شويه دلوقت ..

والله ان ما كنت انا موجود تحت ؛ لكان أصحاب الديون طلعوا هربدوا البيت .. ولا كان نفع فيهم جرس خطر ، ولا صندوق ولا أى حيلة من حيلنا دى !.. دا وكيل صاحب الملك كل يوم والتانى عايز يقابلك علشان أجرة الشقة المتأخره ، وأنا اوزعه واقول له انك مسافر .. وكل ما حد غريب يسأل عن حضرتك أقول له مش موجود .. أمال فكر جنابك أنا

قاعد تحت أقشر بصل ؟..

نجيب: كل ده كويس .. لكن بقا ..

عبد الله : لكن كله من قلة البخت ..

نجيب : انت لاخر قليل البخت ؟...

عبد الله : ربنا أعلم بحالي ..

نجیب : علشان عاوز نص ریال ؟..

عبد الله : نص ريال .. ربع ريال .. اللي يطلع من ذمتك ..

نجیب : انت فاهم ذمتی دی جراب أطلع منه انصاص ریالات

وارباع ريالات ؟..

عبد الله : بقى ما فيش النهارده جبر خاطر ؟..

نجيب : ربنا أعلم بحالي ..

عبد الله : النهارده أول الشهر ...

نجيب : أول الشهر كان الصبح ..

عبد الله : ودلوقت ؟..

نجيب : دلوقت اسمه آخر الشهر . .

عبد الله : كده بالعجل ؟..

نجيب : النتيجه الرسمية بتاعتي كده .. أول الشهر يبتدي من

الساعه ٩ صباحاً لغاية الساعه ١١ والدقيقه ٥٠ ..

يعنى على ما يضرب مدفع الضهر أكون شطبت طبعًا .. إنت فاكر إيه ؟.. احنا ما عندناش فلوس تبات لتانى يوم ..

عبد الله : على كده جنابك رايح تعمل إيه في دى ؟..

## ( يقدم الورقة التي معه ... )

نجيب : إيه دى ؟..

عبد الله : فاتورة حساب ..

نجيب : هس !.. ما تسمعنيش كلمة حساب .. إياك تنطق بالكلمه دى في بيتى .. أنا مؤمن على حياتى ضد الكلمه دى ..

عبد الله : دا خريستو البقال ..

نجيب : ما اعرفوش ..

عبد الله : عاوز يقبض ..

نجيب : قل له بلاش عبط ..

عبد الله : له ٢٥٠ قرش استجرار الشهر اللي فات .. منهم ٣٠٠ قرش سلفه نقديه و ٢٠٠ قرش باقى الشهر اللي قبله و ١٥٠ قرش ..

نجيب : اسكت اعمل معروف .. ما فيش فايده .. ربنا خلق

لى طبل ودان ما يلقطش الحساب ..

عبد الله : الخواجه حلف ما يشكك حضرتك ..

نجيب : حلف بايه ؟..

عبد الله : حلف بدينه قدام بوابين الحته ..

نجيب : إنه ما يشككنيش ؟..

عبد الله : أبدًا ..

نجيب : (يغنى) قال إيه حلف مايشككنيش .. قال إيه حلف .. ( فجأة ينفجر في غضب ) أقسم بالله الذي خلق السلف نعمة للناس إنى لا أتعامل مع الوغد خريستو ده لا شكك ولا نقديه .. خلاص .. مبسوط ؟..

عبد الله : ونجيب لوازمنا منين ؟..

نجیب : شوف بقال تانی .. هو بقی ما فیش فی مصر غیر خریستو ؟..

عبد الله : ما فیش غیره .. و کافة بقالین الحته عرفتنا .. بقی لنا سنه ، کل شهرین نغیر بقال ..

نجيب : بقى احنا خلصنا بقالين قصر النيل كلهم ؟..

عبد الله : خلصناهم كلهم، ودوبناهم في عرق العافيه ..

نجيب : ما فيش بقال فتح جديد ؟..

عبد الله : أبدًا .. أنا واخد بالى طيب من كل دكان يفتــــح جديد ..

نجيب : شيء يجنن !.. والعمل بقى دلوقت ؟..

عبد الله : أحسن طريقه تدفع لخريستو قرشين من أصل المطلوب ونرجع له ..

نجیب : نرجع له .. مش ممکن .. أنا حلفت خلاص .. ما یمکنش ..

عبد الله : خريستو برده مهاود ابن حلال ، أحسن من غيره ..

نجيب : انت مجنون .. مستحيل .. وقع مني يمين ..

عبد الله : إن الله غفور رحيم ..

نجيب : حتى اليمين نقعد نبعزق فيه ..؟

عبد الله : معلهش .. برده أحسن من البهدله نراضيه ونرجع

له ..

نجيب : إنا لله وإنا لخريستو راجعون ..

عبد الله : ندفع له النهارده ۲۰۰ قرش ..

نجيب : ۲۰۰۰ إيه ؟..

عبد الله : إن ما كانش النهارده يكون بكره ؟..

نجيب : وان ما كانش بكره ؟..

عبد الله : يكون بعده ..

نجيب : دا كلام جميل .. لما انت تعرف تسمعني الكلام الحلو

ده ساكت ليه من الصبح ؟.. سبحان الله !.. انزل

بقى خليني آخذ خمس دقايق استراحه ..

عبد الله : ( في تردد ) فيه موضوع تاني ..

نجيب : موضوع مفرح من فضلك ؟..

عبد الله : مفرح قوى ..

نجيب : خير .. قل بسرعه ..

عبد الله : الربع ريال لازمني ضروري ..

نجيب : ( ناظرًا شزرا ) دا الموضوع المفرح قوى ٩٠٠

عبد الله : ما هو أصل أنا كنت الأول طالب من جنابك نص

ريال ، لكن بقى ..

نجيب : لكن بقى مراعاة للحاله الحاضره عملت لى تنزيل ٥٠ في التربيب : الكن بقى مراعاة للحاله الحاضره

فى الماية .. مفهوم ..

عبد الله : أنا قلبي دايما على جنابك ..

نجيب : أشكرك على إحساساتك ..

عبد الله : ( يشير إلى جاكته نجيب ) اهرش جنابك في جيب

الجاكته ..

نجيب : (ينهض ويخلع جاكتته ويقذف بها إليه ) خد اهرش فيها بمعرفتك ..

عبد الله : ( يتلقاها ويبحث في جيوبها جميعها ) اللي ما فيها برغوت نقديه !..

نجيب : (جالسًا) علشان تصدق ..

عبد الله : ( ينظر إليه في ارتياب ) أمال جنابك نازل بره دلوقت ازاي ؟..

نجيب : ومين قال لك انى نازل ؟..

عبد الله : جنابك مش نازل النهارده ..

نجیب : أنزل ازای ؟.. عینك كلها نظر ..

عبد الله : يعني جنابك حاتفضل محبوس هنا ؟..

نجيب : قسمتي ..

عبد الله : لحد إمتى ؟..

نجيب : لحد ما تسلفني انت ربع ريال ..

عبد الله : كويس !.. لأمش ضرورى بقى نزول جنابك .. اقعد لحد ما يفرجها الكريم من ناحيه تانيه ( جوس

التليفون يدق ) إياك ده الفرج ..

نجيب : ( بلا حراك ) عشم إبليس في الجنه . .

عبد الله : مين عارف ؟..

نجيب : مش منظور إن مدير البنك الأهلى يطلبنى فى التليفون علمان يقول لى أمرنا لك بخمسين جنيه ... على كل

حال روح انت شوف مین ..

عبد الله : ( يتجه إلى التليفون ) يا سيدنا الحسين ..

نجيب : إن كان واحد من اياهم ارمى السماعه على طول ١٠٠

عبد الله : ( يرفع السماعة ) آلو .. آلو .. مين ؟.. نجيب بك ... حاضر ( يلتفت إلى نجيب ) دى واحده ست

عاوزه حضرتك ..

غبيب : (ينتفض) ست .. (ينهض ويهرع إلى التليفون)

آلو .. أفندم .. آه .. هو انت يا سوسو ؟.. نعم ..

عاوزه إيه ؟.. ما بظهرش ؟.. طبعا فيه سبب مهم ..

لأ مش زعلان منك .. أنا زعلان من نفسى .. لأمش

نازل النهارده .. لأنى منحاش .. منحاش في البيت ..

اللى حايشنى ؟.. سبب مهم .. ( يبعد فمه عن البوق

ويخاطب عبد الله ) أقول لها على السبب يا سي عبد الله

( يعود إلى التليفون ) لأما اقـدرش النهار ده ..

متأسف .. أورفوار .. ( يضع السماعة ويجلس وهو يقول لعبد الله ) صدقت ؟.. قلت لك ده مش مدير البنك الأهلى تقول لى لأ .. ما فيش فايده ..

عبد الله : ( بعد لحظة صمت ) بقى ما فيش مع حضرتك ربع ريال ؟..

نجیب : ( فی صبر عجیب ) إن كان مع حضرتی ٣ صاغ كنت نزلت .. عاوز أفهمك أكتر من كده ؟..

عبد الله : ( في لحظة تفكير ) جنابك برده تقدر تجبر بخاطرى ..

نجیب : ( فی اهتمام ) ازای بقا یا شاطر ؟..

عبد الله : المطبخ فيه كروانة نحاس تساوى لها نصف ريال ..

نجيب : بس كده ؟..

عبد الله : وفيه كمان لحوق كويس يجيب له ٧ قروش صاغ ..

نجيب : كويس .. وانا آكل فى إيه ؟..

عبد الله : في اللوكانده ..

نجیب : یا سیدی .. یا سیدی !!..

عبد الله : محمد السفرجى طفش .. ومين اللي رايح يطبخ لجنابك ؟.. مفيش غير اللوكانده ..

نجيب : ( في تهكم خفي ) الكونتنتال !..

( رصاصة في القلب )

عبد الله : اللي تستحسنها ..

نجيب : تعجبني ..

عبد الله : وأكل اللوكانده على كل حال أحسن من تلكليك محمد

السفرجي اللي يقرف الكلب ..

نجيب : طبعا .. لكن بقى يا فصيح اللوكانده دى بـلاش والا بفلوس ؟..

عبد الله : شكك لحد أول الشهر ..

نجيب : يا مسكين يا أول الشهر .. أول الشهر ده لو كان جمل ، كان زمانه وقع من طوله مغشيا عليه !..

عبد الله : وإيه الرأى بقى يا سى نجيب بك ؟..

نجيب : اللي تشوفه جنابك ..

( جرس التليفون يدق .... )

عبد الله : التليفون !..

نجيب : تعال شوف مين ..

عبد الله : ( يمسك السماعة ) آلو .. ؟ واحده ست برده ..

نجیب : عاوزه ایه دی کان ؟.. هات ورینی (یأخسله

السماعة ) آلو .. مين .. حسنيه ؟.. أفندم .. عاوزاني ضروري ؟.. مش ممكن .. ما اقدرش انزل

النهارده .. سبب مهم .. منحاش .. أيوه منحاش .. برده لازم أجيلك حالا فى تاكسى ؟.. طيب انتظرى على التليفون لحظه ( يلتفت إلى عبد الله ) نصف ريال سلف يا عبد الله بك !..

عبد الله : منين ؟..

نجيب

نجیب : ابحث فی أی حته .. لازمنی ضروری .. اعمل معروف ..

عبد الله : تعمل به إيه جنابك ؟...

نجيب : أجرة تاكسي يا مغفل ..

عبد الله : أنا ورايا شغل مش فاضى ..

(يتحرك للانصراف ....)

: (يبصق نحوه) ما انا برده عارفك ندل خسع ا...
( وفى الحال يتجه إلى البلكون فى الجهة اليسرى
ويقف ببابه ويرفع رأسه إلى أعلى ويصفر ) يا
مصطفى .. يا مصطفى .. سيدك سامى لسه
ما رجعش من العياده ؟.. لسه ؟.. طيب احدف لى
حالا نص ريال وحياة أبوك .. ما فيش ازاى ؟.. نص
ريال واحد لا غير يا دون .. ما تعطلنيش .. اخص

على اللى عملكم خدامين .. ( يدخل يائسا ) شيء يجنن ( يمسك السماعة ) آلو .. اسمعى يا حسنيه .. ما فيش فايده أبدًا تعالى انت بتساكسى .. مستحيل ؟.. طيب يا عزيزى أورفوار ..

## (يضع السماعة في الحال ...)

عبد الله : خليك جنابك في بيتك .. برده أحسن !..

نجيب : ( في نظرة شزراء ) أحسن في إيه ؟..

عبد الله : جنابك كنت حاتدفع للتاكسى النص ريال اللي احنا لسه مش عارفين نعتر عليه !..

نجيب : طيب اسكت .. مش عاوز منك كلام 1.. قسما بالله العظيم ما تنطق كلمه واحده زياده إلا أقوم أأكلك علقه تساوى ٣٠٠ قرش 1..

عبد الله : ٣٠ قرش !.. دى و لا أكلة الحباتى الكبابجي !.. طيب قابل ، بس ادفعهم ..

نجيب : تفضل انزل .. وخدها من قصيرها.. إلا انا دلوقت العفاريت بتلعب قدامي ..

عبذالله : لأ . . ربنا يستر . .

( يشير بالسلام ويخرج .... )

غيب : ( يرتمي على المقعد ) ما فيش نزول خلاص .. أنا لازم أعود نفسى على الوحده ، وأعمل زى غاندى واحتقر العالم كله اللى ماشى بالفلوس .. سوسو تحبنى علشان الفلوس ، حسنيه عاوزانى بالفلوس .. آدى الحياه كلها .. فيها إيه غير كده .. وكداب اللى يقول فيه حاجه اسمها عواطف عند مخاليق الله المصنوعين من وحل وطين ..

سامى : ( يدخل فى اندفاع واهتمام ) نجيب ؟..

نجيب : نعم .. مالك عاوز إيه انت لاخر ؟..

سامى : أنا .. أنا ..

نجيب : انطق امال ..

سامى : أنا وقعت من السما وانت تلقفتني ..

نجيب : إمتى ده ؟..

سامى : دلوقت ..

نجيب : أبدًا .. انت لو كنت وقعت دلوقت من السما كنت

سبتك تنكسر رقبتك ..

سامى : ما ترضاش .. أنا عارف قلبك وأخلاقك ..

نجيب : الغرض .. بالاختصار انت عاوز إيه دلوقت ؟..

سامى : ما تكلمنيش باللهجه دى يا نجيب .. شجعنسى شويه ..

نجیب : أشجعك يعنى إيه ؟.. شجع نفسك ، وتكلم انت وقول اللي عاوز تقوله ..

سامى : أنا .. انت عارف انى خاطب فيفى ..

نجيب : عارف ..

سامى : طبعًا .. لسه مش خطوبه رسميه لغايـة دلـوقت ..

إنما ..

نجیب : زی بعضه ..

سامي

سامى : لأ . . مش زى بعضه . .

نجيب : المهم انكم بتحبوا بعض ..

: مش كفايه .. الخطوه المهمه والعقبه أهلها .. فيفى أو لا وارثه النهارده ، ومتوفر لها فى المجلس الحسبى أكثر من ١٢ ألف جنيه .. وعائلتها كبيره معروفه ، وما اقدرش أقول لك ان كانوا يرضوا بواحد زيى والا لأ .. خصوصًا أنا معت ان أهلها مشترطين مهر لا يقل عن ٨٠٠ جنيه وشبكة ٣٠٠ جنيه .. يعنى واحده زى دى تتكلف لها حوالى ١١٠٠ جنيه ..

نجيب : وماله .. انت لك في البنك مبلغ وقدره ..

سامى : كل رصيدى ألف جنيه لا غير ..

نجيب : نعمه من الله ! . . فيه غيرك رصيده النهارده ما حصلش

٣ قروش صاغ ..

سامي : لاحظ ان ألف جنيه ما يعملوش حاجه يا نجيب ..

نجيب : ( في تهكم ) أبدًا ..

سامى : أنا باكلمك جد .. انت أولا شفت فيفى .. بنت

شیك صحیح .. اللی زی دی لازم تعیش عیشه

« لوكس » انت شفتها والا لأ فيفي ؟..

نجيب : ( **مطرقا** ) أيوه ..

سامى : إيه رأيك فيها بذمتك ؟..

نجيب : ( مطرقا ) كويسه ..

سامى : ( فى تحمس ) مش كويسه بس .. جنان ..

نجيب : ( في صوت خافت ) صحيح ..

سامى : بشرفك لو كنت انت فى مركزى مش تعبدها ؟..

نجيب : ( يرفع رأسه ) إيه لزوم السؤال ده ؟..

سامى : تعبدها والالأ ؟..

نجيب : ما اجاوبش ..

سامى : انت حر .. لكن أنا أقسم لك ان فيفى ما فيش زيها التنين في مصر ..

نجيب : ( مطرقا ) ما حدش قال انك كداب ..

سامى : بنت « سبور » مدهشه یا نجیب .. ساعات تسوق عربیتها بنفسها .. عربیه « باکار » فخمه .. تصور امبارح باللیل فی شارع الهرم کانت ما سکه الدر کسیون بید واحده وایدها التانیه علی کتفی .. وما شیین علی ۸۰ کیلو ..

نجيب : ( في موارة ) وتدوس الغلابه المساكين !..

سامی : ذی شاطره .. ما تخانش علیها ..

نجيب : ( في نفس المرارة ) طبعا . . الخوف على اللي يمشى في سكتها ..

#### ( صمت .....)

سامى : ( بعد لحظة صمت وتأمل ) أنا احبها قوى يا نجيب . .

نجيب : وانا كمان ِ..

سامى : ( ينظر إليه ) وانت كان ؟..

نجيب : أيوه .. أنا كمانٍ أشجعك على ذلك ..

سامى : ( فى فرح ) صحيح ؟..

نجیب : وهی تحبك قوی یا سامی !..

سامى : جدا ..

نجيب : أنا .. أشجعها على ذلك ..

سامی : انت بتتکلم جد ؟..

نجيب : ما فيش داعي اني أهزر ..

سامى : تفتكر انى كفء لها ..

نجيب : بالتأكيد . .

سامى : ما تنساش ان كل ثروتى عباره عن الألف جنيــه الموضوعه فى البنك ..

نجیب : من ساعة هی ما حبتك ارتفعت قیمتك و بقیت تساوی تقلك دهب ..

سامی : إزای الکلام ده ؟..

نجیب : من یوم أنا ما عرفت انها بتحبك وانت متمتع بكامل احترامي !.. لأول مرة أشعر نحوك باحترام عميق !..

سامى : ( فى دهشة ) للدرجه دى ؟..

نجيب : أمال إيه ؟.. انت نايم ؟.. فوق لنفسك كده وافهم انك دلوقت حاجه تانيه يا ستين مغفل ..

سامى : لأ ما تخفش .. أنا برضه فاهم لو تكون من قسمتى

حانقلب حاجه تانيه صحيح وألعب بالدهب لعب ؟ . . . ، جنيه نقديه في الزمن ده حاجه توهم . . غير العقارات . . علشان كده أنا بقول دى فرصه . . خايف تطير من يدى . .

نجیب : (یبصق) إخص ۱.. صحیح انك منحط ۱.. انت مش عارف أبدًا تخلینی احترمك خمس دقایق علی بعض ۱..

سامى : ليه ؟ . . حصل منى إيه ؟ . .

نجیب : انت مش فاهم وبس .. مش ممکن واحمد زیك یفهم ..

سامى : إيه بس اللي حصل ؟..

نجیب : حصل انك فاكرها بیعه و شروه وأو كازیون خایف یضیع منك .. برضه انت حکیم سوق تجاری ..

سامى : بقى اسمع با نجيب ، أنا مش جاى لك دلوقت علشان تهزأني . .

نجیب : أمال جای لی علشان إیه ؟..

سامى : جاى لك علشان تساعدنى ..

نجيب : أساعدك في إيه ؟..

سامى : تساعدنى بكل قوتك .. وتنقذنى بأى وسيله ؛ لأنى رايح اقع من السما وانت ..

نجيب : انتظر شويه من فضلكِ قبل ما تقع من السما .. وضح لى المسأله علشان أشوف ان كنت اقدر استلقاك والا ما اقدر شهو...

سامى : طبعا المسأله واضحه .. أهلها يستحيل يتنازلوا عن أقل من ألف و ٢٠٠

نجيب : وبعدين ؟..

سامى : وانا مش عاوز أظهر بمظهر الضعف والفقر والاحتياج .. يعنى لازم أدفع فورًا اللي يقولوا عليه من غير تردد أو مماطله ..

نجيب : كويس ..

سامی : وانت عارف ان اللی معای ألف بس .. یعنی لازمنی ۲۰۰ قول ۲۰۰ علشان أهون علیك .. وانا ابقی اتدبر فی الـ ۲۰۰ التانیه ..

نجيب : أنا مش فاهم ..

سامى : بالاختصار أنا أرجوك تسلفى ١٠٠ جنيه دلـوقت حالا .. نجيب : دلوقت حالا ؟!..

سامى : أيوه .. لأنى ناوى أقدم الشبكه والمهر وكل حاجه

بكره قبل ما حد يعطل الشغله ..

نجیب : بقی انت جای لی علشان أسلفك ؟..

سامي : حالا ..

نجيب : آه ..

سامى : سكت ليه ؟.. بتبص لى كدا ليه ؟..

نجيب : أنا قاعد افكر مش لاقي ..

سامى : الفلوس ؟..

نجیب : مش لاق رد کافی شافی یترد به علیك ..

سامى : ليه ؟..

نجیب : عاوز تستلف منی ۱۰۰ قرش ؟..

سامی : ۱۰۰ جنیه ..

نجيب : (يضحك ثم يضحك ) ..

سامى : أنا مستعد اكتب لك بالمبلغ كمبياله ..

نجيب : (يضحك ثم يضحك) ..

سامنی : بتضحك ليه بس ؟.. هـو دا وقت ضحك يـا

نجيب ؟..

: أمال إمتى وقت الضحك ؟.. ( وينهض ويصيح ) أيتها السموات اضحكى .. أيتها الغرفة اضحكى .. أيتها الغرفة اضحكى .. أيها البواب عبد الله اطلع أيها الصندوق اضحك .. أيها البواب عبد الله اطلع حالا واضحك ( لساهى ) واحد من أمرين إما إنك تعبان شويه ، ويستحسن إنى أطلب لك إسعاف بالتليفون ينقلك إلى مستشفى الأمراض العقليه ، وإما إنى أنا اللى تعبان شوية ؛ لأنى أحتكم على وإما إنى أنا اللى تعبان شوية ؛ لأنى أحتكم على . . ، ، جنيه نقدًا وعدًا بدون علمى ، وقاعد منحاش في البيت مع إنى باسلف الناس بكمبيالات ..

سامى : ( يجذب نجيب من جاكتته ) أرجوك تقعد ..

نجيب : سيبني أتكلم وأقنع نفسي أولا ..

سامى : اقعد يا نجيب اعمل معروف ..

نجيب : ( يجلس ) قعدت ..

سامى : يظهر انك مش فاهم الموضوع ..

نجيب : ده مؤكد .. إني أنا فهمت غلط خالص ..

سامى : المسألة مستقبل . . ولذلك أنا أتوسل إليك يا نجيب . .

فاهم ؟.. أنا أتوسل إليك ..

نجيب : العفو .. علشان إيه بس ؟..

سامى : تشوف لى ١٠٠ جنيه ..

نجيب : برده .. ( صائحا ) يا راجل اعقل .. اعقل والا أقسم بالله العظيم أتكلم في التليفون ينقلوك في الحال !.. دا انا لسه يا بارد ما فيش خمس دقايق مصفر لك في البلكون علشان تحدف لي نصف ريال .. تقوم تجيني دلوقت تطلب مني ١٠٠ جنيه ؟..

سامى : انت يا نجيب شخصيه معروفه فى جميع الأوساط والنوادى الكبيره ..

نجيب : ( يلتفت إليه بسرعة ) يعني إيه ؟..

سامى : يعنى إنك شخص ما حدش يرفض لك طلب ..

نجیب : دا صحیح .. لکن قبل کل شیء أنا شخص معروف عند الناس کلها ان لتی کرامه ..

سامى : انت سالف من مارسيل البارمان ٢٠ جنيه ..

نجيب : مارسيل وأمثاله عارفين طيب إن الـ ٢٠ جنيه يقبضوها منى ٤٠ لما تيجى الفرص المناسبه .. ومن هنا لغاية ما تيجى الفرص المناسبة ما اقدرش أظهر نفسى لجنس مخلوق ...

سامى : يعنى ما تقدرش تساعدنى يا نجيب بأى طريقه ؟..

نجيب : في الحاله الراهنه لأ ..

سامي : ما تقدرش تستلف لي من تحت الأرض ؟..

نجيب : لو كان تحت الأرض فيه ناس بتسلف مـا كنــتش

انتظرت لما تفكرنى حضرتك ..

سامى : ( ينظر فى الصالون ) أنا كنت أعتقد انك تقدر ..

نجيب : أرجوك ما تبصش كتير لطقم الصالون ده ؛ لأنه لسه مش مدفوع تمنه ومنظور ينحجز عليه من يـوم

سامى : يعنى ما فيش فايده منك ؟..

نجيب : عينك كلها نظر ..

سامى : ( فى يأس ) يا خساره يا فيفى ..

نجيب : ( بعد لحظة إطراق ) طبعا حاتزعل هي كان لو حصل

مانع ..

سامى : بالطبع ..

نجيب : أيوه .. من غير شك ..

سامي : أيوه ..

نجيب : أيوه ( **لحظة** ) وانت ماتقدرش تصارحها بالمبلغ اللي

ممكن تدفعه ؟...

سامى : مستحيل .. أنا لازم أفهمها اني عريس كــفء

متيسر ..

نجيب : وليه تغشهم ؟..

سامى : الزواج كله كده دلوقت ..

نجيب : أيوه (لحظة صمت وهو مطرق) المهم هو الخب ..

سامى : علشان كده زواجنا لازم يتم ؛ لأننا بنحب بعض ..

نجيب : ( في صوت منخفض غريب ) إن شاء الله يتم ..

سامى : ( فى أمل ) إزاى ؟.. لقيت فكره ؟.. الحقنى اعمل

معروف أنا أبوس رجلك ، انقذلي ...

نجیب : عندی فکره واحده ..

### (یفکر .....)

سامى : قول أنا فى عرضك ...

نجیب : (ی**فکر**) ما فیش غیر ..

سامى : ( **مهتما** ) غير إيه ؟..

نجيب : خاتم الملك ..

سامى : ( ناهضا ) ونلقاه فين ده ؟..

نجيب : موجود .. (يفتح درجا ويخرج خاتما من الماس)

خد ..

سامى : ( ي**تناول الحاتم بتردد** ) لكن ..

نجيب : إيه ؟.. ما ينفعش ؟..

سامى : إدينى عقلك .. ما ينفعش ازاى ؟.. دى حاجه فخمه قــوى .. الله يرحمها الست صاحبة العصمــه والدتك .. انت يظهر كنت ابن ناس طيبين فى زمانك ..

نجیب : هات بقی سیجاره وروح ارهنه أو شوف لك فیه طریقه ..

سامی : ( فی تردد و هو یتأمل الخاتم ) لکن لاً یا نجیب .. ما اقدرش !.. أنا بأی حق اسمح لنفسی بالتصرف فی تذکار عائلی زی ده ؟..

نجيب : مش مهم !..

سامي

سامى : أنا أعتقد ان ده تهجم منى عليك زياده عن اللزوم ، ولا أجرؤش انى أقبل كرمك الغريزى المدهش ده . .

نجيب : تجرأ واقبل ، وروح بسرعه رتب أمورك ..

: على .كل حال يا نجيب أنا ما قدرش اشكرك .. لأن عملك مش من الأعمال اللي تشكر عليها بكلمه أو كلمتين .. وان قلت لك مرسى أو متشكر لعمل (رصاصة في القلب) زی ده أبقی بارد .. انت بالتأكید أنبل وأكسرم وأظرف وأشرف شخصیه خلقها ربنا ..

نجیب : رح بقی ما تبقاش ابن کلب رزل .. دو شتنی ..

سامى : طيب أنا طالع بقى يا نجيب أغسل وشي وأغير ؛ لأنها جايه دلوقت لأول مرة تتفرج على الشقه .. أورفوار

مؤقتا !..

نجيب : أورفوار ..

سامى : بكره أشوفك ضرورى علشان أقول لك أنا عملت إيه ؟..

#### ( خارجا ..... )

نجيب : ( **يصيح به** ) اسمع ...

سامى : ( يلتفت إليه ) نعم ..

نجيب : معاكش نص ريال سلف ؟..

سامى : ( فى حركة حماسية يخرج محفظتــه ) يـــا سلام

يا نجيب .. خد المبلغ اللي انت عـاوزه..جنيــه ..

خمسه .. عشره ..

نجيب : باقول لك نص ريال ..

سامى : بس كده ..

#### ( يعطيه نص ريال ..... )

نجیب : أیوه بس نص ریال .. افهم عربی .. مش طالب غیره .. هات کان سیجاره .. ولع لی .. بس رح بقی ابعد عنی .. نهارك سعید ..

( سامى يخرج ... نجيب يظل وحده على مقعد مفكرا يدخن .... )

( جرس الباب يرن .... )

( نجيب ينهض بسرعبة .. ثم يسرع إلى الطاولــة ويدخل الصندوق ....)

( فيفى تنقر على باب الصالون وإذ تجده خاليا تتقدم

**ڧ تردد ... )** تاماد ماد ماد ماد داد ا

( وتجلس على مقعد ثم تتململ وتنادى .... )

: ما فیش حد هنا .. سامی ...

نجيب : (يرفع غطاء الصندوق ، أى المنصدة ويظهر رأسه )..

فيفى : ( تراه فى الصندوق خارجا فستصرخ فى رعب ) آه !..

نجيب : ( خارجا من الطاولة ) لا مؤاخذه .. باردون ..

فيفى : نجيب بك ..

فيفي

نجيب : أيوه .. أنا نجيب ..

فيفى : (ضاحكة ومشيرة إلى الصندوق) وعامل في نفسك كده له ؟..

نجيب : مش مهم .. أولا أنا أحب أعرف سبب تشريفك هنا ..

فيفي : وأنا أحب أعرف صفتك إيه هنا ؟..

نجیب : بقی حضرتك كل ما تقبلینی فی حته تقولی لی صفتك ایه ؟..

فيفي : طبعًا .. أسألك عن صفتك هنا بالحاله دى ..

نجیب : صفتی انی فی محل سکنی ..

فیفی : ( فی دهشة ) دا محل سکنك .. أمال سامی فین ؟..

نجيب : شقة سامي فوق .. حضرتك غلطتي في الدور..

فیفی : آه .. صحیح .. باردون .. طیب أما أقوم اطلع بقی .. قبل کده مش تحب تقول لی انت کنت

مستخبى ليه كدا ؟..

نجيب : احتياطيا بس .. علشان ما اقابلش بعض الناس غير المرغوب فيهم ..

**فیفی** : زی مین ..

نجيب : ناس كتير يطول شرحهم ..

فيفي : أنا منهم ؟..

نجيب : انت ؟..

فيفي : قول بصراحه ..

نجيب : مأ اقدرش اقول لك ..

( فيفي تمتعض قليلا لهذا الجواب .... )

فیفی : مرسی .. وعرفت ازای انی جیت ؟..

نجیب : علشان ضربتی جرس الخطر ..

فيفى : جرس الخطر دا إيه ؟..

نجيب : جرس الباب .. لأن كل واحد يضرب الجرس معناه عندنا إنه غريب عن البيت ، أقوم أنا في الحاله دى أدخل الغواصه ..

(يشير إلى المنضدة ....)

فيفى : ( تنظر إلى المنضدة التي على شكل الصندوق ) الغواصة !..

( تضحك ..... )

نجيب : أمال .. احنا دلوقت في حالة حرب .. ودحول الأعداء الغواصه ضروري علشان لو دخل حد من الأعداء

يلاقى الشقه ما فيهاش مخلوق يقوم يتقهقر بانتظام ..

فيفى : ( باسمة ) والمعارف .. دول الحلفاء طبعًا يدخلوا على طول من غير ضرب الجرس ...

نجيب : طبعًا . ولذلك الباب دايما مفتوح . . والحلفاء عندهم تنبيه بعدم ضرب الجرس . .

فيفى : أنا متأسفه اللي أزعجتك ودخلتك الغوصه من غير سبب .. ما كنتش أعرف .. على كل حال اعتبر انك كنت بتعمل مناوره .. إنما اسمح لى أقول لك ان دى طريقه غريبه !.. تفتكر ان فيه ناس كتير عاملين صناديق وغواصات زى دى علشان ما يقابلوش حد ؟..

نجيب : ما أظنش ..

فيفي : اشمعني بقي انت اللي عجيب في أطوارك ؟..

نجيب : علشان ربنا خلقني كدا ..

فيفى : أنا ملاحظه ان أعصابك النهارده مرتاحه ..

نجيب : الحمد لله ..

فیفی : إنما دا ما يمنعش إنك تكره الست اللي بتاكل جلاس عند جروبي زي ما تكره فاتسوره الحساب تمام ..

مش كدا ؟..

نجيب : أرجوك ما تفكرنيش بفواتير الحساب ..

فيفى : ولا بالست اللي انت تكرهها ؟..

نجيب : لاحظى سيادتك أن سامي منتظر فوق ..

فيفي : أنا طالعه حالا .. انت متضايق من وجودي ؟..

نجيب : أنا ما قلتش كدا ..

فيفى : باين في عينيك انك متضايق..

نجيب : وهو كذلك ..

فيفى : علشان كده أسيبك .. أورفوار ..

نجيب : أورفوار ..

فيفي

: (تتحرك إلى الباب فترى الجرامفون فى طريقها فتقف ) دا الجرامفون بتاعك ؟.. عندك أسطوانات جديدة طبعًا .. على فكره .. أما امبارح سمعنا فى مينا هوس دور جديد فى الجازباند بديع قوى .. اسمه .. نسيت .. دلوقت أسأل لك سامى عن اسمه .. أنا امبارح سقت البكار بنفسى ..

نجيب : عارف .. في شارع الهرم .. الدركسيون بيد واحدة سرعة ٨٠ كيلو ..

فيفي : سامي قال لك ..

نجيب : طبعًا ..

فيفى : بقى سامى لازم يقول لك كده علم كل شيء ؟..

نجيب : صاحبي ..

فيفي : على فكره .. إيه رأيك في سامي ؟..

نجیب ': رأیی فی سامی إنه شاب مدهش ..

فيفي : أنا مش شايفاه مدهش في حاجه أبدًا ..

غيب : أستغفر الله .. اسمحى لى أقول لك الك غلطانه غيب .. انت عاوزه أحسن من كده إيه في الدنيا ؟..

شاب لطيف .. حكيم كويس .. فلوس عنده في البنك .. مالوش داين يطالبه بقرش أو يزعجه بفاتورة

حساب .. وفضلا عن كله .. بيحبك ..

فیفی : بیحبنی ؟..

نجيب : يعبدك ..

فيفى : مين كان غيره بيحبني ؟..

نجيب : ما فيش غيره ..

فيفي : انت كداب ...

نجيب : مش عاوزه تصدق .. انت حره ..

فيفي : طيب بص في وشي .. حط عينك في عيني ..

نجيب : لالالا .. اعملي معروف ما فيش داعي أبدًا اني أبص

في وش حضرتك ولا احط عيني في عينك ...

فیفی: شوف انت خفت من عینی ازای ؟..

نجيب : ما عليهش ..

فيفي : قل لي يا نجيب ..

نجيب : : ما شاء الله ..

فيفى : إيه ؟..

نجيب : نجيب كدا حاف ..! لا نجيب أفندى .. ولا نجيب

بك .. ولا حتى سي نجيب .. حضرتك واخده

ر احتك معايه في الكلام زياده عن اللزوم ..

فيفى : ( فى امتعاض ) كدا ؟..

نجيب : انت مش ملاحظه ؟..

فيفي : كنت افتكر انك ( سبور. ) ..

فيفى : اللي قال لك كدا غشك ..

فيفي : كنت افتكر ان لى الحق اعاملك من غير تكليف

بصفتك صاحب سامى الحميم .. ومع ذلك أنــا

حاخسر إيه ؟.. تحب أقول لك يا نجيب باشا ؟..

: أحب تقولي ٰلي ﴿ جود باي ﴾ .. بس وتسيبيني في نجيب حالي !..

: إنت النهارده وحش صحيح ..

فيفي : طول عمرى كده .. (يتناول سماعة التليفون نجيب بسرعة ) آلو .. مين .. سوسو .. اسمعي .. أنا لازم اقابلك النهارده .. وهو كذلك .. بعد عشر دقايق أكون عندك .. نروح فين ؟.. زى ما يعجبك انت . . أور فوار مؤقتًا . .

#### (يضع السماعة ....)

: ( في مرارة ) دي واحده ست .. فيفي

> : أظن كدا .. نجيب

: أنا دلوقت فهمت .. فيفي

> : فهمت إيه ؟.. نجيب

: فهمت انك نسيت بالعجل الست بتاعة جروبي .. فيفي

> : الحمد لله اللي فهمت كدا .. نجيب

: ( تنصوف ) نهارك سعيد .. فيفي

: ( بلا حراك ) نهارك سعيد .. نجيب

﴿ فَيْفَى تَخْرِجٍ . . وَيَنْقَى نَجِيبٍ لَحْظَةٌ جَامَدًا ثُم يُوتَمَى على مقعد ويضع رأسه بين يديه ... )

# الفصل الثالث

(عين منظر الفصل الشانى .. أى شقة نجيب .. نجيب واقف بقرب الجراموفون يسمع أسطوانسة (La petite Tonkinoise) لجوزفين بيكر وهو يتحرك كأنه يرقص على أنغامها .. ولا تكاد الأسطوانة تصل إلى ربعها حتى يدخل سامى ..)

سامى : ( في اهتمام واندفاع ) نجيب !..

نجيب : (يشير إلى الأسطوانة ) هس !.. اسمع النغمــه دى !..

سامي : المسأله مهمه قوى .. فضك من البتاع ده دلوقت ..

نجيب : ( يوقف الفونوغراف في تبرم ) هه !.. مالك بقى ياسيدى .. ادو شنى وقل مزاجى !..

سامى : شوف يا نجيب .. المسأله انى أنا وقعت من السما ..

نجيب : وانا تلقفتك . . ما عندكش شغل أبدًا غير انك تقع من

السما ؟..

سامى : الحقيقة انهم مسألتين مش مسأله !..

نجيب : كان ؟!..

سامى : أولا الخاتم الألماس بتاعك ..

نجيب : ماله ؟..

سامی : راح ..

سامي

سامي

نجیب : راح ازای ؟.. یخرب بیتك ..

: راح من إيدك .. من إيدينا .. لأنى خلاص قدمته شبكه لفيفى !.. وانت إذا كنت تحب اكتب لك به كمبياله بأى مبلغ يعجبك يدفع على أربع سنين كان بها .. وإذا كنت تحب تشنقنى اشنقنى .. أنا بين إيديك واللي تعمله اعمله !..

نجیب : تذکار أمی یا جدع انت !..

: أنا غلطت ووريته لفيفى مسكت فيه .. اضطريت أقول لها انه الشبكة !.. ونسيت ساعتها انه تذكار أمك .. ( يستدرك ) والدتك !.. الحقيقة انه خاتم مدهش يا نجيب .. كل من شافه يستعسجب !.. ما فيش بضاعه زى دى دلوقت عند الجواهرجيه !..

نجيب : وأهلها قالوا إيه ؟..

سامى : فرحوا طبعًا .. وبقوا يوروه لمعارفهم .. أنا قلت لهم

تمنه ۲۰۰ جنیه .

نجيب : ده اللي ينتظر منك ..

سامی : أبدًا .. الواقع انه یساوی کده برده .. عند نجیب الجواهرجی خاتم ما یجیش ربعه مکتوب علیه ۳۰۰

جنيه !..

نجیب : انت لو کنت رهنته علی ۱۰۰ أو ۲۰۰ جنیه ما کنتش حاتقدر تقدم شبکه بالعظمه دی !..

سامى : ما هو ده نفس اللي انا شفته برده !..

نجيب : احترموك طبعًا .. ورقبتك بقت أطول من البساب

: طبعًا ..

سامي

نجيب : وخطيبتك مبسوطه بالتأكيد ..

سامى : فيفي حاتطير به طيران .. لابساه في اصبعها ودايره

تفرجه للناس !..

نجيب : ( في صوت خافت ) دا المهم !..

سامى : ( بعد لحظة فى تردد ) لكن بس ..

نجيب : ( يرفع رأسه نحوه ) إيه بقى ؟..

سامي : ( ف تردد ) انت مش زعلان يا نجيب !...

نجيب : علشان إيه ؟..

سامى : علشان الخاتم ضاع .. لأنه لو كان اترهن على أى

مبلغ ، كان برده على الأقل فيه أمل انه يرجع لك في أي

وقت !.. لكن دلوقت ما فيش أمل أبدا.

نجيب : طيب وعاوز مني إيه بقى دلوقت ؟..

سامى : ولا حاجه .. انت اللي عاوز منى ا..

نجيب : عاوز منك إيه ؟..

سامى : من حقك إنك تزدريني على الأقل وتحتقرنى ؛ لأنى زودتها خالص !..

نجيب : مش فاضى انا دلوقت أحتقرك ..

سامى : سكوتك يا نجيب بيخوفني ..

نجيب : ما تخافش ..

سامی : ضمیری بیوبخنی ..

نجيب : وآخرتها معاك بقى ؟.. انت عارف انا ماليش تقل على

الفلسفه .. ضميرك يو بخك ، ويهزأك ، يرقعك

بالصرمه ، أنا دخلي إيه ؟ا..

: طيب .. سامي

: آدى مسأله فاتت . . إيه بقى المسأله التانيه ؟ . . نجيب

> : المسأله التانيه .. سامي

> > : انطق .. نجيب

: كتب الكتاب .. سامي

> : ماله .. نجيب

: كان غرضي يتم في أقرب فرصه .. سامي

> : و جرى إيه ؟.. نجيب

: فيفي مصهينه شويه وقاعده تماطل وتمطوح ... سامي

> : وإيه السبب .. نجيب

> > سامي

: مش قادر أفهم .. سامي

: من إمتى الكلام ده ؟.. نجيب : أخيرًا ..

: طيب وانت مستعجل على إيه .. نجيب

: ازاى .. انت عبيط ؟ .. لازم ننتهي بسرعه قبل ما سامي

يخلصوا منى القرشين ( تجيب ينظر إليه شزرًا ) بتبص لي كده ليه ؟.. مش عاجبك كلامي ؟.. أنا شايف اني باتكلم بعقل ..

نجيب : بعقل زياده عن اللزوم ..

سامى : أصل الموضوع ده بالذات عايز كده !..

نجيب : بالعكس ..

سامى : إنت مش فاهم مركزى يا نجيب .. أنا أقل واحد تجرأ انه يخطب فيفى !.. دى تقدموا لها أكبر ناس فى مصر ورفضتهم .. إنت نايم ؟.. دى معروفه فى البلد كلها انها لقطه وحيده ، اللى ينولها كأنه نال ..

نجيب : ( في تهكم ) البنك الأهلي ؟..

سامى : السعاده في الدارين !..

نجيب : دا صحيح 1..

سامبي : ولذلك أنا عايز اطمئن ..

نجيب: طبعًا !..

نجيب

سامى : عايز اعمل كل جهدى إن كتب الكتاب ينتهى فى ظرف أسبوع ..

: أسبوع ؟!.. همو الزواج سلق بيض يما حضرة الأفندى ، والا هى العباره نهب !.. اهمدا وابسرد وتعفف شويه أ.. انتم ليه كده نماس بطمالين شباحين !.. الدنيا بخير ولله الحمد .. ولا حمدش

بيموت من الجوع .. وانت عندك ألف مدعوق مصرى في البنك !..

سامى : يعنى تفضل انى أترك لهم حرية تحديد اليسوم اللي يعجبهم ؟..

نجيب : بالتأكيد !..

سامى : فكره .. برضه علشان ما اظهرش قدامهم بمظهر اللحوح الملهوف !..

نجيب : ما فيش عندك غير انك تظهر بالمظهر! برضه تفكيرك مش عاجبني أبدًا!

سامى : ليه ؟..

نجیب : أنا والله خایف انك ماتستحقش عروسه جمیله زی دی ا..

سامى : ( فى قلق ) ازاى ؟ . . لأ . . ماتخوفنيش امال ! . .

نجيب : ما عندكش عواطف أبدًا ..

سامى : ( يتشفس الصعداء ) لأ .. عندى .. اطمفن .. العمام .. العواطف دى موجوده دايما فوق البيعه !..

نجيب : البيعه ؟.. شوف برضه ألفاظك مش عاجباني ا..

سامی : ( یصیح ) و بعدین بقی .. انت حاتطیر لی برج من

عقلى .. جاتك البلا .. سمج !.. أنا مش ضرورى أعجبك انت .. أنا ما دمت عاجب فيفى طظ فى حضرتك وفى الدنيا كلها !..

نجيب : ( يطرق ) أنا كل قصدى انك تعجبها !..

سامى : عاجبها غصب عنك !..

نجيب : دا المهم ..

( صمت .. ينهض ويتجمه إلى الجرامفون ليديسر الأسطوانة )

سامى : بلاش فونوغراف دلوقت .. اعمل معروف خلينـا نتكلم شويه !..

نجیب : عاوز منی ایه کمان ؟..

سامى : ولا حاجه !..

نجيب : طيب خلاص بقى اعتق رقبتى ا..

سامى : ما تخافش .. خلاص عتقتك .. أنا كان غرضى اسألك عن أحوالك انت !..

نجيب : أحوالي أنا عال قوى .. كتر خيرك !..

سامى : على فكره .. الست اللي كنت قابلتها في جروبي بتاكل جلاس ووقعت في حبها !.. ما فيش خبر عنها أبدًا ؟..

غيب : لأ !..

سامى : أنا متأسف إنى غرقان لشوشتى فى مسألة فيفى زى ما انت شايف .. وإلا انا كنت حالا شفت لك

طريقه !..

نجيب : ممنون ..

سامى : وأحوالك الماليه ماشيه ؟..

نجيب : أحوالي الماليه فتحت بصعود ٥ بنط وقفلت بنزول

بنطين !..

سامى : هي إيه ؟..

نجيب : البورصة !..

سامى : بورصة إيه ؟..

نجيب : أعمل لك إيه ؟.. حضرتك بتسألنى إذا كانت أحوالى الماليه ماشيه ؟.. أقول لك إيه بس ؟.. شيء يجنن ؟.. تاجر أقطان أنا في بورصة مينا البصل ؟!.. من إمتى

كان لى أحوال ماليه ماشيه والا قاعده ؟..

سامى : أنا غرضى أسألك عن الحجز المتوقع على عفشك لسه ماشى والا ..

نجیب : طبعًا ده ماشی .. أمال حایروح فین ؟..

سامى : وإمتى تحدد يوم البيع ؟..

نجيب : ما اعرفش .. اسأل عبد الله البواب .. هو اللي تعين

حارس 1.

سامي : على الله من هنا ليوم البيع يجي لك قرشين ..

نجيب : منين يبجو القرشين .. ما دام ما انفتحت لناش

الجيوب ولا القلوب !..

سامى : طبعًا انت عارف ظروفي صعب !..

نجيب : جدًا ..

سامى : على كل حال ربنا يفرجها من فضله ..

نجيب : والله أنا في غاية الخجل من ربنا .. لأنه سبق فرجها

كتير من فضله !

سامى : ( ينهض للانصراف ) مش كتير عليه المره دى كان ..

بنجيب : انت قايم ؟..

سامى : أيوه .. علشان ورايا ميعاد !

نجيب : مع خطيبتك طبعًا ..

سامى : بالطبع مع فيفى !..

نجيب : طيب .. مع السلامه ..

( سامي يخرج بعد أن يحيى بإشارة ... )

## ( نجيب ساهم بلا حراك لحظة .... )

عبد الله : ( يدخل ومعه ورقة ) سيدى نجيب بك !..

نجيب : أفندم ..

عبد الله : النهارده كام في الشهر ؟..

نجيب : (في ارتياع) ليه بقى الله لا يسيئك !..

عبد الله : لأ .. ما فيش حاجه .. ما تخافش ..

نجيب : ما انتش جايب وراك مصيبه النهارده ؟..

عبد الله : لأ .. ما فيش لا سمح الله مصايب .. واحنا مالنـا ومالها .. شر بره وبعيد !..

نجيب : أمال الورقه اللي في إيدك دي إيه ؟..

عبد الله : لأ .. دى لسه ما جاش وقتها !..

نجيب : الحمد لله ..

عبد الله : روق بال جنابك ..

نجيب : أصل انت دايما تيجي تطلع على جتتي البلا من غير مناسبه !..

عبد الله : لأ .. خــلاص ان شاء الله مــا يجيش على قدومي إلا الخير ..

نجیب : طیب یا سیدی .. عشمنا کده برده ..

عبد الله : الغرض وما فيه .. أنا كنت عايز أقول لحضرتك !..

نجيب : إيه .. إياك انت جاى طالب منى فلوس ؟..

عبد الله : برده ما اقدرش أكدب حضرتك في دى !.. لكن

بقى أ...

نجیب : لکن بقی ایه ؟.. أنا کان أملی تطلعنی مره کداب فی دی ..

عبد الله : على كل حال دى مسألة مش مهمه دلوقت ..

نجيب : أيوه كده اعمل معروف.. فضنا من المسائل اللي مش مهمه !.. انت كنت طالع ليه بالضبط ؟..

عبد الله : هو النهارده مش ۱۲ في الشهر ؟..

نجيب : النهارده ١٤

عبد الله : ( صائحًا ) ١٤ في الشهر ؟.. يا خبر اسود !..

نجيب : ( في هلع ) اسود ازاي ؟..

عبد الله : النهارده مصيبه مستنظرانا ولا احناش داريين !..

نجیب : قلت لك كده تقول لى ما فیش مصایب النهارده !.. ایه بقی یا سیدی قول ؟.. تكلم .. موتنی .. هات

خبرى بالعجل 1..

عبد الله : المحضر كان قال إن يوم البيع ١٤ الشهر ده !..

نجيب : ١٤ أبريل !..

عبد الله : جنابك مش عارف ؟..

نجيب : أعرف منين ؟..

عبد الله : أنا سلمت لجنابك صورة من ورقة الحجز زي دي ..

## ( يقدم الورقة ... )

نجیب : وانت فاهم انی لاقی نفسی علشان اقرا محاضر جمجز وافور دمی قبل المیعاد ؟..

عبد الله : طيب خد جنابك استقرا الورقه دى ، وشوف يمكن احنا غلطانين ..

نجیب : هات یا سیدی ورینی ..

(يتناولى الورقة وينشرها ويقرأ الآتى :.....) عضر حجز تنفيذى .. إنه فى يوم الأحد ٢ مارس سنة عضر حجز تنفيذى .. إنه فى يوم الأحد ٢ مارس سنة ٩٣٢ الساعة ٥٥ / ١٠ أفرنكى صباحا .. بناء على طلب الخواجات جبران سعد الله وإخوته المتخذين لهم عملا مختارًا مكتب حضرة حامد فرغلى أفندى المحامى .. وبالاطلاع على صورة محضر الحجنز التحفظى الرقيم ٧ فبراير سنة ١٩٣٢ المحكوم بتثبيته ، وعلى الحكم الصادر غيابيا من محكمة مصر الأهلية فى

القضية المدنية نمرة ٤٨١٦ سنة ١٩٣٢ المشمول بصيغة التنفيذ والنفاذ، ومعلن قانونا وموكل لنا بتنفيذه .. أنا عبد الحميد قزمان محضر محكمة مصر الأهلية وصلت إلى شارع قصر النيل وبمساعدة شيخ القسم قد تواجدت بالمسكن استئجار المدعى عليه نجيب أفندي إحسان فلم أجده ، ونبهت على تابعه بواب العمارة عبد الله محميس المقيم معه في معيشة واحدة بدفع مبلغ ٥٦٨٠ قرشًا قيمة المحكوم بـــه والمصاريف وأتعاب المحاماة .. فأجاب أن المدعى عليه غائب ، ولعدم الدفع دخلت العين المؤجرة وأوقعت الحجز التنفيذي على الآتي: ـ عدد ١ ترابيزة وسط خشب أبيض بأربعة أرجل مستعمله سليمة . . عدد ١ كنصول خزران وعليه رخامة بيضاوي سليمة .. عدد ۱ بساط قطيفة مبرد ٤ × ٥ .. عدد ٣ براقع ستاير خشب مشجر بحلية قطيفة .. عدد ١٢ كرسي خزران ببویه بنی ؟ عدد ١ سرير خشب بلد كان ببويه بيضه وعليه مله خشب بسلك وثلاث مراتب نوم بوجه تيل مقلم حشو قطن ومخدتين نوم بوش ستانيه

أخضر ، و لحاف ستانيه بمبه .. عدد ٤ حلل نحاس بغطاهم من فوق بعض وزن الجميع ١٥ رطل .. عدد ١ أنجر نحاس أربعة أرطال .. ( نجيب يقطع القراءة ويلتفت إلى عبد الله في فرح ) ده نسيوه ؟..

عبد الله : نسيوه ازاى ؟.. محجوز عليه برده .. استقرا جنابك ضهر الورقة تلاقى بقية القايمه ..

غيب : (يقرأ) عدد ٦ كنبه وفوتيل وكراسي صالون ..
عدد ٣ طاولة كبيرة وصغيرة .. وعدد ١ فونوغراف
ماركة جرامفون وعشر أسطوانات أفرنجية وعربية
مستعملة سليمة .. ( نجيب يقطع القراءة ويلتفت
إلى عبد الله ) حتى الجرامفون والأسطوانات يا عبد
الله ؟.. دول قشطونا تمام .. وجردونا وخربوا
يتنا ..

عبد الله : استقرا .. استقرا .. لسه كمان ..

نجیب : (یقرأ) عدد ۱ دولاب ملابس بضلفتین ویمرآه مصقولة سلیمة.. عدد ۳۵ قطعة فقط لا غیر و لم نجد خلاف ذلك ولعدم وجود.. (نجیب یلتفت لعبد الله) ازای ما وجدوش خلاف ذلك؟.. بقی ده كل العفش؟!..

عبد الله : (يغمز بعينيه) أصل أنا كلام فى سر جنابك هربت الباقى .. التناتيش الخفيفه ..

نجيب : كنت بالمره هرب العفش كله يا عبيط ..

عبد الله : ازاى أهربه ؟.. ده يبقى اسمه عزال .. وانا صنعتى هنا بواب العماره .. أقوم أعزل شقه بحالها من غير علم صاحبها ؟.. وأعزل حضرتك فين ..؟

نجيب : النهايه .. أهو المحضر هو اللي عزلنا .. (يعاود القراءة) نه. فقط لاغير ولم نجد خلاف ذلك ولعدم وجود من يقبل الحراسه فقد عينت عبد الله خميس بواب العمارة حارسا على جميع ما حجز عليه وحذرته بالقانون وقبل الحراسة وحددت لمبيع المحجوزات يوم الاثنين ١٤ أبريل سنة ١٩٣٢ من الساعة ٩ صباحا لآخر النهار ..

عبد الله : يعنى النهارده ..

نجيب : (يستمرفى القراءة) و حررت هذا المحضر وتركت للمدين صورة مخاطبًا مع تابعه عبد الله خميس لغيابه وسلمت له صورة بصفته حارسا ..

عبد الله : وقال لي إن ضاع جنس شيء من اللي مكتوب في القايمه

أروح أنا في الحديد ..

نجيب : طبعًا ..

عبد الله : لكن أدحنا بقينا العصر ولا فيش حد جه باع ولا اشترى !.. يكونوش نسيوا ؟..

نجيب : ينسوا ازاى ؟.. طول بالك دلوقت تتفرج على بهدلتنا قدام اللي يسوا و اللي ما يسواش!...

عبد الله : وإيه العمل دلوقت ؟..

نجيب : ما فيش عمل بالمرة ..

عبد الله : بس لو كانش راح من بالى ان النهارده ١٤ في الشهر !..

نجيب : يعنى كنت حاتعمل إيه يا سي عبد الله ؟.. دا حتى أحسن اللي راح من بالك .. على الأقبل علمان ما نزعلش قبل الهنا بسنه .. فضك بلا وجع دماغ .. دا انا لو كنت اكدر خاطرى علمان مسائل زى دى كان زمانى توفيت بقالى ١٥ سنه ومدفون النهارده فى قرافة المجاورين ( يتجه إلى الجرامفون) اسكت لما اسمع الأسطوانه المدهشه قبل ما بيجوا يا خذوا الفونوغراف!..

عبد الله : لك حق .. جنابك فرفش .. ما حـد واخــد منها حاحه ل..

( يخرج عبد الله .. نجيب يدير الأسطوانة التى أدارها فى أول الفصل « لجوزفين ببكر » ثم يتحرك راقصًا على أنغامها فى قوة وعدم اكتراث .. )

( فيفى تدخل فجأة بعد لحظة فترى نجيب يرقص وحده فى الحجرة على نغم الأسطوانة فتقف باسمه مشاهدة .. ويراها نجيب فلا يغير ما هو فيه .. ويظل يرقص غير حافل بوجودها وتسر فيفى من حركاته فتجلس على مقعد أمامه تتفرج .. ولا تتالك أحيانا من الضحك لحركاته الفكاهية .. إلى أن تسنتهى الأسطوانة فيرفع نجيب الإبرة وهو يصفر بفمه ... )

ذ ( فى ابتهاج ) مدهش !.. أرجوك تعيد الأسطوانه

فيفى : ( فى ابتهاج ) مدهش !.. أرجوك تعيد الأسطوان دى كان مره ..

نجيب : (ينظر إليها من رأسها إلى حذائها ولا يجيب ) ؟..

فيفى : (في امتعاض) بتبص لي كده ليه ؟..

نجيب : شيء جميل خالص !..

فيفي : إيه هو اللي جميل خالص ؟..

نجيب : أو لا دخول حضرتك على طول كده كأنها وكاله من غير بواب !..

فيفى : كنت عايزنى أضرب جرس الخطر ؟.. كان زمانك دلوقت جوا الغواصه بقالك ٥ دقايق ، في الحرده !..

نجيب : سيادتك مش غلطانه المره دى في دور سامي ؟..

فيفي : لا أبدًا .. أنا عارفه ان دى الأبارتمان بتاعتك ..

نجيب : طيب .. بقى أنا أحب أعرف بسرعه سبب التشريف ..

فيفى : اسمع اما اقول لك قبل كل شيء. انت يجب تغير بسرعه للمجتك دى ، وتكلمنى بسرعه بشكل ألطف من كده ، وإلا انا وحياة راس ماما أجننك واوريك النجوم الضهر !..

نجيب : وحياة راس ماما أنا شايف النجوم الضهر والصبح والعصر وطول النهار .. ومش منتظر سيادتك دلوقت علشان توريهم لى 1..

فيفى : ليه بقى ؟.. إيه اللي مزعلك ؟..

نجيب : فيه ألف سبب وسبب ا...

فيفي : ومع ذلك أنا دخلت فجأة لقيتك مبسوط بترقص على

الجرامفون !..

: الطيري قص مذبوحا .. نجيب

: ( في اهتمام ) انت متأ لم من إيه ؟.. أرجوك تقول لي فيفي

حالا ...

: أقول لك انت ؟!.. نجيب

> : إيه المانع ؟.. فيفي

: مستحيل !.. نجيب

: مانتش واثق مني ؟.. فيف

: يا سيدتى العزيزه .. أرجوك ترك الموضوع ده نهائيا نجيب

نتكلم في شيء مفيد إن كان لا بد من الكلام ..

: انت بتحب .. فيفي

: شوفي انت ازاى حاتز عليني منك وتخليني ابقى مش نجيب

لطيف و دمي يفور وأتكلم كلام فارغ كتير .. وبعد كده تحلفي ان انا اللي محقوق ..

: طيب خلاص .. مش حا اقول حاجه ..

فيفي

: انت كنت جايه علشان إيه ؟.. نجيب

> : كنت جايه علشان .. فيفي

> > : أفندم ؟.. نجيب

فيفى : علشان أوريك الشبكه اللي قدمها لي سامى .. خاتم عجسيب !.. شوف .. ( تريسه الخاتم وهسو في إصبعها ) فص واحد برلنت سوليتير ..

نجيب : عجبك ؟..

فیفی : قوی .. قوی .. حاجه حلوه صحیح .. و ذوق جمیل صحیح ..

نجيب : العفويا فندم !..

فيفي : ( تنظر إليه في دهشة ) ؟..

نجيب : ( يستدرك ) قصدى يعنى بالنيابة عن سامى ..

فيفى : ( صمت .. تتأمل الخاتم فى أصبعها ) سامى غنى التأكيد ..

نجيب : أيوه طبعًا ..

فيفي : هو كان قال لى ..

نجيب : قال لك إيه ؟..

فيفى : قال لى إن عنده ، ، ، ، ، جنيه فى البنك رايح يبنى لى بهم فيللا فى مصر الجديده ..

نجیب : ( هازًا رأسه فی تهکم خفسی ) ضربهم فی ٦ علی طول !..

فيفي ٠ : وقال لي ان عنده أطيان ما اعرفش فين ..

نجيب : كان ؟.. طبعا ..

فيفي: و يحبني قوى تعرف ؟..

نجيب : عارف ، وانت بتحبيه .. وكتب الكتاب إمتى

بقي ؟..

فیفی : ما اعرفش .. سامی عایز یکتبه من بکره ..

نجيب : له حق ...

فيفى : لكن أنا متردده شويه ..

نجيب : مالكيش حق ..

عبد الله : ( يدخل ) سيدى نجيب بك ..

نجيب : خير ..

عبد الله : ( ناظرا إلى وجود فيفي ) دا .. أقول ؟..

نجيب : قول .. خد راحتك ..

عبد الله : المكوجي طالب حسابه ..

نجيب : وانت ما عندكش لسان ترد عليه ؟..

عبد الله : ما أمكنيش أبدًا .. غلب حمارى وياه ..

نجیب : وعایز ضروری تغلبنی أنا کان ویـاکم ؟.. حسابــه

كتير ؟..

عبد الله : بقى له شهرين ماقبضش أبيض ولا اسود ..

نجيب : أعوذ بالله .. وكان ساكت ليه لغاية دلوقت ؟..

عبد الله : إنسانيه منه ..

نجيب : وجرى لها إيه الإنسانيه دى النهارده ؟

عبد الله : لقى ما فيش منها فايده ..

نجيب : وإيه اللي تشوفه انت دلوقت ؟..

عيد الله : يجي يحاسبك جنابك ..

نجيب : (كالمرتاع) يحاسبني ؟..

عبد الله : ما فيش غير كده ..

نجيب : أنا عملت لك حاجه يا عبد الله ؟.. زعلتك النهارده في

شیء ؟.. متأثر منی ؟.. بینك وبینی ضغائــن ؟..

فهمني اعمل معروف ..

عبد الله : أنا فاهم .. جنابك تكره الحساب .. لكن ما باليد حله ..

نجیب : یا سلام سلم .. الحساب ده نهرب منه ازای ؟..

عبد الله : حساب المكوجي ؟..

نجيب : الحساب على وجه العموم .. الأرض فيها حساب ..

ننزل القبر نلقى فيه حساب .. نطلع السما نلاقى فيها

( رصاصة في القلب )

حساب .. ورانا في كل حته .. ما فيش فايده أبدًا ..

فيفى : ( تضحك ضحكة خفيفة ) ؟..

نجیب : روح یا شیخ قول للمکوجی دا یبرد شویه ..

عبد الله : ما يرضاش يبرد إلا لو قبض ..

نجيب : ( صائحًا ) قل له يجي يقبض روحي بقي ، لأني

لا أملك غيرها النهارده 1.. وتفضل من غير مطرود

يا بواب يا مغفل قبل ما اعوج لك خلقتك باسطوانه

من دول وزی ما ترسی .. نور در بازی ما ترسی ..

( نجيب يمسك أسطوانة .. عبد الله يجرى خائفًا .. )

فیفی : ( تکتم ضحکها ) ..

نجيب : شيء يقصر العمر ..

( يعود إلى قربها .... )

فیفی : هدی نفسك شویه ..

نجيب : ما يمكنش .. أهو أنا ما يمضيش على ساعه على خير

أبدًا .. لا بد من خبر مزعج ..

فيفى : يظهر إن ماليتك مرتبكه شويه ..

نجيب : شويه ؟!.. انت متواضعه قوى !..

فيفي : طيب ما تيجي نفكر في تنظيم ماليتك ..

نجيب : ما تتعبيش نفسك ..

فيفي : ليه ؟..

نجیب : لأن لو جمیع وزراء مالیة العالم اجتمعوا فی لوزان وعملوا مؤتمر لتنظیم مالیتی وتسویة دیونی زی مؤتمر نزع السلاح ودیون الحرب ، أؤ کد لك انهم یمکن ینجحوا فی نزع السلاح ودیون الحرب ولا ینجحوش فی مسألتی . . عاوزه إیه بقی أکتر من کده ! . .

فيفي : للدرجه دى ؟..

نجيب : دى مسأله مش محتاجه لمناقشه ..

فيفى : ليه ماهيتك كام ؟.. ولو ان ده تطفل منى .. لكن أنا مهتمه وأحب اجرب يمكن أنجح أحسن من مؤتمر لوزان ..

نجيب : ما هيتي خمسين جنيه في الشهر اسما .. لكن اللي بيوصل في يدى ٤٤ جنيه و ٢٠٠٠ مليم بعد الاحتياطي والمعاش ورسم الدمغة وخلافة من تماحيك آخر الزمن !..

فيفى : وبتصرف منهم كام في الشهر ؟.. خ

نجيب : باصرف منهم حوالي ١٠٠ جنيه في الشهر !..

نجيب : باستمرار من نهار ربنا ما خلقنى .. علشان كـده المسأله عويصه ولا يمكنش حلها إلا إذا اخترعـوا حساب جديد يمشى يالمقلـوب غير الحساب اللى أوجده فيثاغورث ..

فيفي : وتصرف الـ ١٠٠ جنيه ازاى في الشهر ؟..

نجيب : ما اقدرش اقول لك .. أنا لما يكون في جيبي فلوس ما احترمهاش .. أصرفها بعقل ومن غير عقــل .. يمكن ألاق شحات في السكه أعطيه ورقه بجنيه لأنه قال كلمه عجبتني ..

فيفى : انت مدهش !..

نجيب : أنا إنسان مكتوب عليه انه يعيش بشكل مخصوص ف الحياه ، ويستحيل تتغير حياته ، يستحيل ينتظم ويستحيل يعيش يوم في أمان الله زى بقية مخاليق الله الطيبين !..

فیفی : حیاه بوهمیه غریبه !...ٔ

نجیب : ارتباك مزمن وعسر هضم اقتصادی وفقر دم مالی

مالهش علاج ..

فيفى : انت غلطان .. أفتكر ان فيه علاج ..

نجيب: إيه هو من فضلك ؟..

فيفي: لو تتزوج واحده تفهمك ويكون عندها فلوس..

نجیب : ویکون عندها ( باکار )..

فيفي : تمام كده ..

نجيب : علشان ينباع البكـار .. ونغـرق احنـا الاتــنين في

نهار !..

فيفى : ( **باسمة** ) وماله ؟..

نجيب : أظن واحد زيى ما انخلقش علشان زواج ..

فيفى : تفتكر كده ؟..

( جرس الباب يدق بشده ... )

نجيب : جرس الخطر !.. ( يتحسوك ويسرع إلى المنضدة ويرفع غطاء الصندوق ويلتفت إلى فيفي ) عن إذنك

دقيقة واحده ..

فيفى : حاتدخل الغواصة ؟.. دى مش طريقه عمليه أبدًا ..

نجيب : دا اختراع ألماني !.. مستحيل أقدر أبص في سحنة

مطالب .. أوروفوار مؤقتا ..

#### ﴿ يغلق على نفسه الصندوق ..... ﴾

عبد الله : ( من الخارج ) يا حضرة المحضر باقول لك نجيب بيه مش موجود . .

المحضر : (یدخل وخلفه خواجه وشیخ القسم وعبد الله ) وجود المدین وعدم وجوده ما یهمنیش .. ( لشیخ القسم ) نادی الشیالین ..

شیخ القسم : (یتجه إلی الباب وینادی ) اطلع یا شیال انت وهوه !..

المحضر: قبل ما نشرع فى التنفيذ أنبه عليك يا عبد الله خميس بصفتك تابع للمدين ومقيم معه فى معيشه واحده بأن تدفع لدينا حالا مبلغ ٥٦٨٠ قرشا واحنا نوقف الإجراءات. تدفع والالأ ؟..

عبد الله : لأ .. منين ؟.. هو احنا معانا خمسه مليم ..

الخواجة : ( وهو يتكلم بلغة واضحة سليمة مع عجمة خفيفة ) أنا عندى تفويض من الداين الخواجه جبران لو تدفع أربعين جنيه يصير التنازل عن الحجز والبيع ..

عبد الله : ( ينظر إليه و لا يعنى بالرد عليه ، ويلتفت للشيالين ) شيل شيل يا شيال . .

المحضر: تابع المدين أجاب بعدم السداد وشرعنا في التنفيذ ... تعال يا عبد الله خميس بصفتك حارس للمنقولات قدم لنا المحجوز عليه ..

عبد الله : آهو عندك ..

المحضر : ( محتدًا ) آهو عندى ازاى يا قليل الأدب يا حمار !..
انت مش عارف أنا مين ؟.. فتح عينك كويس وكلمنى باحترام .. أنا حامى القانون و ممثل سلطة الحكومه ، انت فاهم إيه !.. وشرف مركزى أعتبرك مبدد وأحرر ضدك في الحال محضر تبديد وتعدى وأحط الحديد في إيديك وأضيع مستقبلك ..

عبد الله : لأ .. مفيش لزوم .. أنا غلطت والشفاعـه لشيــخ التمن ..

شيخ القسم: استسمح حضرة المحضر وابقى خد بالك يا ابنى الا تنضر ( للمحضر ) أصله مش واخد على مقابلة الحكام ..

المحضر : ( في عظمة ) الحق علينا اللي عيناه حارس .. ضيع وقتنا واحنا لسه ورانا بيوع و حجوزات وانتقالات .. عبد الله : يا جناب المحضر العفش تمام ماضاعش منه قشايه ..

المحضر : ( يعطى المحضر لشيخ القسم ) حد يا شيخ القسم صورة محضر الحجز واجرد وطابق القايمه ( يجلس على مقعد ) إلا احنا تعبانين من كثرة الأعمال .. اتفضل استريح يا خواجه يوسف ..

الخواجة يوسف : ( ينظر إلى فيفى الجالسة المتفرجة فى ابتسام ) بردون يا مدام ..

فيفى : ( **للخواجة** ) من فضلك ما يمكنش تأجيل البيع لبكره واحنا ندفع كل الفلوس ؟..

المحضر: ما يمكنش يا هانم ، تأجيل البيع يتكلف مصاريف ويستدعى إعادة اللصق والنشر وكافة الإجراءات ، ودى مما طلات احنا عارفينها ..

فیفی : أنا متأسفة . . مـا فـیش فی شنطتــی ٤٠ جنیــه دلوقت . . إنما أقدر . .

شيخ القسم: (يقرأ ببطء في الورقة): «عدد ١ تربيزة وسط خشب أبيض بأربعة أرجل مستعمله سليمه .. » فين ؟.. ( يلتفت حوله )مش موجوده ..

عبد الله : دى في المطبخ .. مش موجوده ازاى ؟.. اجرد الأوده دى اللي انت فيها الأول تلاقى كل شيء تمام ..

المحضر: أيوه أجرد أوده أوده ، والشيالين تنزل أول بأول ، والناقص يتحرر به محضر ..

شيخ القسم: (يقرأ) « عدد ٦ فوتيل وكراسي وكنبه .. عدد ٣ طوله وفونوغراف إلخ .. (ينظر بعينيه مطابقا) الأوده دى تمام انزل بها يا شيال انت وهوه .

عبد الله : ( لشيخ القسم ) حا تاخذ العفش على فين ؟..

الشيخ : على باب الشارع يترص حته حته علشان الناس تيجى على ضرب الجرس تدخل المزاد ..

عبد الله : ( يهز رأسه آسفًا ) يا فضيحة جنابك يا سي نجيب .

(ينهمك الشيالون فى زحزحة الكراسى وتغيير نظام الصالون وينهض المحضر والحواجة يوسف ليدعا الشيالين تنقل مقعديهما ، وتظل فيفى جالسة إلى أن يدنو منها شيال يريد نقل مقعدها ... )

المحضر: تفضلي يا هانم الناحيه دى .. في الرواقه .. ( وتقف بجوار المنضدة التي فيها نجيب .. ولكسن لا يلبث أن يأتي الشيالون لنقل المنضدة فتصيح فيفي ممانعة ) فيفى : ( صائحة ) انتظر يا شيال .. انت و احد الصندوق ده على فين ؟..

المحضر: دا من ضمن المحجوزات يا هانم ..

فیفی : مستحیل !.. ده فیه جوه حاجات غیر محجوز علیها طبعا ؟..

المحضر : محجوز عليه يا هانم .. من فضلك ما تعرقل يش التنفيذ .. شيل يا شيال ..

فيفى : ( صائحة ) مستحيل .. مش معقول .. لازم تسيب الصندوق ده ..

المحضر: ما يمكنش يا هانم ..

فيفى : أنا مستحيل أسمح بنقله ..

المحضر: ( في غلظة ) شيل شيل يا شيال .. بلاش عطله ..

الخواجة : تقدري يا مدام تدفعي كام من أصل المبلغ ؟..

فيفى : أنا متأسفه ما فيش معايا النهارده فلوس كفايه ( فجأة ) اسمع لما أقول لك : أنا أقدر أعطيك ده ( تخلع الخاتم من إصبعها ) إيه رأيك ؟.. ثمنه بالتأكيد

أكثر من مبلغك 1..

الخواجه : ( فى دهشة يفحص الخاتم ) خاتم ألماس ( يخرج من

جيبه عوينة ثما يستعملها الجواهرجيه للفحص، ويضعها على عينه وينظر إلى الخاتم ) طبعًا دا يساوى كتير ..

نجيب : ( فجأة يرفع الغطاء ويظهر صاحب بين دهشة وارتياع الجميع ) إنت مجنونه !؟.. هات الخاتم ده يا خواجه !..

المحضر : ( بعد لحظة وجوم ) بسم الله الرحمن الرحيم .. طلع منين ده ؟..

شيخ القسم: دا لازم المدين ..

( المحضر والشيخ يستعلمان من عبد الله الذي يشرح لهما همسًا )

نجيب : الخاتم .. هات الخاتم يا خواجه اعمل معروف ..

الخواجه : بردون يابيه !..

(ينظر إلى فيفي التي سلمت إليه الخاتم ...)

نجیب : ما فیش بردون ..

فيفى : اسكت يا نجيب مالكش دعوى !.. حلى الخاتم معاك يا خواجه ..

نجیب : إزای الکلام ده ؟.. دا خاتم ألماس مش لعب ..

فيفى : عارفه انه خاتم ألماس مش لعب .. وعاوزه أتصرف فيه .. أرميه البحر .. الخاتم بتاعى أنا .. انت شريكى !...

نجیب : بتاعك ازاى ؟!..

فیفی : پا قبول لك اسكت يا نجيب .. انت ما لـكش دعوى !..

نجیب : مالیش دعوی ازای ؟.. أمال مین اللی له دعوی ؟.. دا شیء یجنن !.. هات الخاتم یا خواجه ..

فيفى : ما تسمعش كلامه ياخواجه .. زى انا ما قلت لك خلى الخاتم معاك وبكره أجيب لك مبلغك ، على شرط توقف البيع حالا ..

الخواجه : بكل ممنونيه يا هانم .. يا حضره أنا طالب إيقـاف البيع ..

المحضر : انزل ياشيال انت وهو ( يتناول ورقة ويكمتب ) عضر إيقاف ( ثم يكتب في صمت ويقول ) أوقفنا الإجراءات كطلب وكيل الداين ، تعال امضى يا خواجه يوسف ..

الخواجة : ( يوقع على ورقة المحضر ثم يخرج ورقة من جيبه

ویکتب إیصالاً یقدمهٔ لفیفی ) موسی یا هانم .. آدی وصل بخاتم ألماس فص واحد برلنت سولیتیر وزن ۸ قراریط ..

نجيب : (بسرعة) تسعه ونصف . .

( فیفی تنظر إلیه والجمیع فی استغراب فیستدرك بسرعه ..... )

أيوه .. أنا عارف من سامي ..

يوسف : ( وهو يكتب ) تسعة قراريط ونص .. ( يسلمها الورقة ) أورفوار .. أورفوار يا نجيب بك ..

( یخرج .....)

نجیب : ( یضرب أخماسًا الأسداس ) أما یا نساس دی عجیبه !..

المحضر: نهاركم سعيد يا حضرات ..

( يخرج خلف الخواجة يوسف ومعه شيخ القسم )

عبد الله : ( خارجا كذلك خلف المحضر ) اخلى طرفى يا جناب المحضر .. الحكومة حرستنى على العفش وطلع لله الحمد سليم ( يخرج مع الجميع )

فيفى : ( وحدها مع نجيب ) عجيبه ليه بقى ؟!.. حاجـه

طبيعيه خالص .. كنت منتظر انى أسيبهم يا خدوك في الصندوق ويبيعوا فيك ويشتروا كأنك محجوز عليك انت كان ضمن الموبيليا ؟..

نجيب : وماله ؟!.. لكن الخاتم ..

فيفى : فى داهيه الخاتم .. إيه يعنى الخاتم ؟.. أدفعه فديــه بصفتى من الحلفاء أحسن ما كانوا يصادروا الغواصه باللي فيها ؟!..

نجيب : غواصة إيه ؟ [.. إحنا خسرنا الحرب ! [..

فيفى : ( ضاحكة ) أبدًا .. بالعكس ..

نجيب : إيه اللي كسبناه ؟..

فيفى : كل حاجه .. أنا مندهشه ليه تهتم بالخاتم بالشكــل دا ؟ ا...

نجیب : بس علشان ده .. شبکة سامی ..

فيفى : وإيه يعنى ؟؟..

نجيب : طيب ورايحه تقولى لسامي إيه لو سألك النهارده على الحاتم ؟..

فيفى : أقول له على اللي حصل ..

نجيب : ما يصدقش ..

فيفى : جايز ما يصدقش .. لأن سامى مش زيك أو زيى.. دى عقليته ما تقدرش تفهم بسهوله التصر فات دى ..

نجيب : لأنه رجل عاقل موزون ..

فيفى : زياده عن اللزوم .. ولذلك أنا رايحه أكلمه كلام شديد ..

نجبب : حاتقولي له إيه ؟..

فیفی : حا اقول له أنا مندهشه ازای واحد صاحبك ساكن معاك فی بیت واحد ینحجز علیه وانت ساكت ؟!..

نجيب : حا يعمل لي إيه ؟.. كل واحد عنده ظروفه ..

فیفی : اسمع یا نجیب ، انت إما مغفل ... ما تآخذنیش ...
و إما عاوز تدافع قدامی عن سامی دفاع
ما یستحقوش .. انت بالتأکید تفهم سامی أکتر
منی .. لأنی فهمت طبیعته کویس قوی من مده
بسیطه ..

نجیب : أنا أشهد لك دایما بالذكاء .. إیه بقی اللی فهمتیه ؟.. فیفی : فهمت أنه رجل عاقل زی ما قلت انت تمام ، ویوزن كل حاجه فی الدنیا زی طبیعة كل شخص مادی

شويه ..

نجيب : إيه كان ا؟..

فيفى : أنا أفهم كويس الناس المدهونين بويه .. سامى مدهون بويه كويس قوى .

نجيب : كل الناس كدا ..

فيفي : انت لأ ..

نجیب : لیه بقی ؟.. أنا یعنی اللی خشب أبیض زی طرابیزة الوسط ؟.. المسأله ان ظروف غیر ظروف سامی .. وأنا لو كنت لقیت فیه فایده كان زمانی ضربت نفسی بویه بالزیت .. ثلات .. أربع و شاش ...

فيفى : ما افتكرش ..

نجيب : على كل حال .. بعد الزواج في إمكانك تخلقي سامي خلقه جديده ..

فيفي : أنا مش عاوزه أخلقه ولا أسخطه ..

نجیب : عاجبك زى ما هو كده ما فیش بأس ..

فیفی : أرجوك .. بس .. كفایه .. احنا تكلمنا عن سامی زیاده عن اللزوم .. كلمنی عن موضوع تسانی .. كلمنی عن نفسك ..

نجيب : أكلمك عن نفسى أقول إيه ؟.. ( يشير إلى الصالون المبعثر ) آدى انت على يدك شايفه كل حاجه ..

فيفى : حقا .. صحيح انت الشخص الوحيد اللي أقدر أقول انه ما حاولش لحظه إنه يغشني ..

نجيب : انت لطيفه قوى معايه النهارده من غير مناسبه !.. بس ضيعت الخاتم ، لكن بقى الأمر لله !.. الكلام دلوقت أصبح ما يجيش منه ..

فيفى : مالكش دعوى بالخاتم .. اسمع يا نجيب !.. انت نسيت الطب الروحاني والسحر العجيب ؟..

نجيب : مش فاهم غرضك ..

فيفي : انت مش تعرف تقرالي اللي في ضميري ؟..

نجيب : أبدًا ..

فيفى : ازاى ؟.. مش فاكر لما تقابلنا أول مره في العياده ؟..

نجيب : آه !.. لأ .. أرجوك تنسى المقابله دى واللي حصل فيها ..

فیفی : انت عبیط !.. أنساها ازای ؟.. انت ما تقدرش تطلب منی طلب زی ده ...

نجیب : انت حره .. لکن أنا أنسي زي ما يعجبني ..

(رصاصة في القلب)

فيفي : لأ .. ما تنساش يا نجيب .. أرجوك !..

نجیب : عجمایب !.. انت کان عماوزه تحجموری علی ذاکرتی !..

فيفي : أيوه عاوزه أحجز ..

نجيب : ( بعد لحظة ) وإيه بقى اللي يهمك من كدا ؟ . .

فيفي : ما تعرفش إيه اللي يهمني ؟..

نجيب : أبدًا ..

فيفي : ما تقدرش تقرالي اللي في قلبي وضميري دلوقت ؟..

نجیب : فی ضمیرك إنك قاعده تمكری علی و تلعبی بمهاره مخیفه ..

فيفى : ( **باسمة** ) كداب ا..

نجيب : ( مستمرا ) في ضميرك إنك عاوزة ترجعي في نفسى أمل بسيط من غير لزوم ، علشان في الآخر أقع من سابع سما لسابع أرض ، زى الدورق الفخار اللي يقع من فوق السطح على الأسفلت ..

فيفي : كداب ..

نجیب : فی ضمیرك إنك بتحبی شخص كویس قوی ، و هو یحبك كتیر قوی . : والشخص ده موجود هنا في الأوده دى دلوقت ؟.. فيفي

: بالطبع لأ .. نجيب

> : كداب .. فيفي

: ( في دهشة ) كداب ؟!.. نجيب

: ( في إخلاص ) من غير شك كداب لو تفتكر ان فيفي الشخص ده مش موجود هنا دلوقت قدامي !..

: ( ينظر إليها في صمت وكأنه يغالب نفسه ثم يطرق نجيب مفكرا) ..

: ( تطرق في انتظار جوابه بصبر نافد ثم ترفع رأسها فيفي كم تقول شيئًا لإخراجه من صمته ) ..

: ( يوفع رأسه أخيرًا إليها ) متشكر على التصريح الخطير نجيب ده !..

> : ( في امتعاض ) بس كده ؟!.. فيفي

> > : ( في عزم ) بس كده !. نجيب

: دا كل اللي تقدر تقوله ؟!.. فيفي

> : كفايه .. نجيب

: ( في يأس ) أنا كنت منتظره انت حاتقول كــلام فيفي كتير !..

نجیب : متأسف قوی .. أنا صحیح فی شدة التأثر من تصریحك ، لكن بقی ..

فيفى : لكن بقى إيه ؟..

نجيب : لكن بقى .. إيه قيمته دلوقت ؟.. تفتكرى حايغير إيه من الموقف كله ..

فيفي : فهمت قصدك .. انت جنتلمان زياده عن اللزوم ..

نجيب : أرجوك تطلعي فوق لخطيبك وتسحبي تصريحك ..

فيفي : مش عاوز بأى حال من الأحوال تقبله منى ؟..

نجيب : فات الأوان !..

فيفى : ( بعد لحظة ) ضميرك مش قادر يسمح لك إنك تاخذ من صديقك خطيبته .. مهما كانت الظروف مش دى كل المشكله اللي قايمه في نفسك ؟..

نجيب : (مطرقا كالمخاطب لنفسه) أيوه مهما كانت الظروف..

فيفى : ( فى تأثر ) نجيب ..

نجيب : (في عزم) الوداع يا فيفي !..

( يتساول يسديها ويضغط عليهما في حسرارة وإخلاص . . ثم يشيعها إلى باب الشقة ، ثم يعود وحيدًا وهو مطرق يمشى في بطء ، ويقف في وسط

القاعة بلا حراك لحظة ، ثم يرفع رأسه فجسأة ويقول : )

: « ونا وش زواج ؟.. أنا رد حجوزات !.. »

(ثم يتجه إلى موضع الجرامفون ويدير الأسطوانة ويصغى إليها قليلا شارد الفكر ساهما ثم يتحرك فجأة راقصا على أنغامها كأنما يريد أن يقنع نفسه بأن حياته هي دائما حياته .. وأنه لم يتغير في حياته شيء .. )



# رصاصة في القلب

#### في السينها

كتبت رصاصة في القلب عام ١٩٣١ .

وأخرجت في فيلم سينهائي عام ١٩٤٤ .

بطولة وألحان وغناء الموسيقار محمد عبد الوهاب .

وإخراج الأستاذ محمد كريم .



### كلمة المؤلف

« لا شأن لى بالسينها »! كان هذا ردى دائمًا على كل من حاول إغرائى بإخراج رواية لى على الستار . ولعلى قلت ذلك أيضًا لصديقى الأستاذ محمد عبد الوهاب . ولكنه جعل يهون على الأمر ، حتى وقعت أخيرًا بين حبائل أو « شرائط » هذا الفن العجيب ...

ولست أدرى بعد نتيجة هذه « الوقعة » . فأنا قد سبق لى أن أبديت رأيى فى الفن السينائى ، وقلت إن الكاتب غير محتاج إلى الالتجاء إليه . لأن القلم كامل بنفسه ، لا ينبغى له أن يستند إلى أداة أخرى تعينه على التعبير . وإن عالم الكتابة مستقل بصوره ومخلوقاته ووسائل إخراجه ، إذ الكاتب فى الحقيقة ليس هو الذي يرصف جملا وينمق عبارات ، إنما هو ذلك الذي يصنع عالمًا زاخرًا بالأشخاص التي تحيا وتشعر وتسعى دون أن يحتاج فى إنشاء هذا العالم إلى غير قلمه وحده ..

هذا الرأى لم يزل قائمًا عندى ما تغير. ولكن الذى تغير هو شعور الكاتب السجين مع مخلوقاته فى صفحاته ، المكبل معها طويلا فى أغلال سطوره . . مثل هذا الكاتب يجد من الأنانية أحيانًا أن يحرم أشخاصه حق الانطلاق لحظة خارج جدران كتبه ، لتحيا بعيدة عن

الإطار الذى اعتادته واعتاده الناس ، نابضة من جديد .. في إطار آخر من صنع أيدٍ جديدة . هذا الخوف من الأثرة هو الذى حملنى على أن أتيح لأشخاص « رصاصة في القلب » مجالا آخر تتحرك فيه غير مجال الورق ..

وبعد فإنى أرجو أن أكون على صواب . ولعل ما يدعونى إلى الرجاء هو حسن اختيار من وضعت فى أيديهم مصير « أشخاصى » ، وما من أحد يشك فى أنها أيد معروفة فى عملها بالصبر والكد والاجتهاد . وانه لمن الظلم أن أسهو عن ذكر تلك الجهود المضنية التى بذلها الأستاذ عبد الوهاب والخرج الأستاذ كريم ومن عاونوهما خلال عامين طويلين لإعداد هذا العمل الذى يشاهده الناس اليوم فى ساعتين . فإذا ظفروا بعد ذلك بنجاح فهو حقهم وجزاؤهم وثمرة مجهودهم وحدهم ..

توفيق الحكيم ١٩٤٤

# كلمة المخرج

إذا أتم الإنسان عملا من أعماله وفق مرامه وهواه فإنه يشعر بإحساسين .. إحساس الغبطة بتمام عمله . وإحساس الأمل في نجاح ما قام به واستفادة الجمهور منه .

ولكننى وقد أتممت فيلم ( رصاصة فى القلب ) وهو أول إنتاج للسينها من كاتبنا الكبير توفيق الحكيم أحس غبطتين ، وأستشعـر أملين .

فغبطتى بتهام عملى تصاحبها سعادة أخرى أتاحها لى من شاركونى في مهمتى ممن لم أكن حظيت قبل اليوم بمشاركتهم ، فقد كان هذا الفيلم فرصة طيبة لى عرفتنى بإخوان أذكياء أكفاء سررت بهم ولمست فيهم من الكفاية والمقدرة ما ملأنى فخرًا بزمالتهم وسعادة بتوفيق الله فى معرفتهم .

وأما أملي في النجاح فقد تضاعف بمقدار ثقتي بقوة الزملاء وبمقدار . ما عرفت فيهم من الإخلاص للعمل والفناء فيه . ولئن تحقق هذا الأمل فلا أشك في أن لهم في تحقيقه النصيب الأوفر واليد العليا وما كنت معهم إلا واحدًا منهم يدفعني إخلاصهم إلى الإخلاص وتحفزني كفاءتهم إلى الاجتهاد

فلهم منى خالص الشكر والتقدير ، وأتمنى لهم شكر الجمهور وتقديره .

محمد کریم ۱۹٤٤

# أسرة فيلم رصاصة في القلب (١٩٤٤)

التأليف والحوار: توفيق الحكيم

السيناريو والإخراج : محمد كريم

الغناء والموسيقي والبطولة : محمد عبد الوهاب

رئيس الفرقة الموسيقية : عزيز صادق

كلمات الأغاني:

(١) إيليا أبو ماضي

(۲) أحمد رامي

( ٣ ) حسين السيد

( ٤) مأمون الشناوي

التصوير : محمد عبد العظم

أخذت المناظر وتم طبعها وتحميضها باستوديو مصر.عبـد الله

ياقوت \_ عبد الحميد أمين عبد المنعم \_ أنور على

الصوت :

للأغاني : مصطفى والى .

للحوار : قدرى محمود .

إميل عطايا وحلمي رسمي :

مساغدان.

#### -187-

كامل حافظ : آلات العرض .

الديكور : ولى الدين سامح .

الماكياج : حلمي رفلة .

الريجسير : قاسم وجدى .

المونتاج : إحسان فرغلي .

# الممثلون

محمد عبد الوهاب : في دور «محسن» [ «نجيب» في النص الأصلي ]

راقية إبراهيم : في دور « فيفي »

سراج منیر : فی دور « دکتور سامی »

على الكسار : في دور « عبد الله البواب »

عبد الوارث عسر: في دور « أبو العزايم » الشحاذ.

فاتن حمامة : في دور « نجوى »

بشارة واكيم : في دور « عبده بك »

الهام حسين : في دور « طماطم »

عبد القدوس : في دور « خورشيد باشا »

زينب صدق : في دور أم « فيفي »

لیلی فوزی : فی دور « حسنیة »

سید سلیمان : فی دور « مارسیل »

حسن كامل : في دور « المحضر »

فيليب كال : في دور « الخواجه »



# أغانى الموسيقار محمد عبد الوهاب

# كلمات « إيليا أبو ماضي »

# لست أدرى

جئت ، لا أعلم من أين ولكنى أتبيت ولقد أبصرت أمامى طريقًا فمشيت وسأبقى سائرًا إن شئت هذا أم أبيت كيف جئت ؟ كيف أبصرت طريقى ؟..

لست أدرى

أنا لا أذكر شيئًا من حياتى الماضية أنا لا أعلم شيئًا من حياتى الآتية لى ذات غير أنى لست أدرى ما هيه فمتى تعسرف ذاتى كنسه ذاتى ؟

لست أدري

أين ضحكى وبكائي وأنا طفل صغير أين جهلي ومراحى وأنا غض غريبر كلها ضاعت ولكن كيسف ضاعت

لست أدري

### کلمات « أحمد رامي »

# مشغول بغيرى

مشغول بغیری و حبیت یا ریتنی ما کنت رأیته صورت جنة من الأحلام وهستبها غصن و دادی و سبت قلبی الشارد هام فی جند الحب یندادی

يطلب أليفه يسعد بطيفه

ويتقضى عمره راضى بهواه

وفضلت اتمنى أعشق واتهنى أتسابى طيرى لايف بعيرى

وانت یا قلبی

حبـك وحبي

للى لقيتـــه بيــحب غيرى

مسکین یـا قلبــی حیران فی حبـــی

لا انت حانقدر يموم تسلاه وتداوى جرحك بالنسيان

ولاح تسرض تبسوح بهواه بعد اللي نابك م الحرمان

مسکین یـا قلبــی مظلـوم فی حبـــی

للي باحبه ويحب غيري

## الميه

وتطفسي نار الحران يا جمالها والحوض مليان وانا عايم على وش الميـه وان طال بك ليل الأوهام وعيونك مش قادره تنام صدقنسي خمد لك حمام يجي نومك والليلة هنيه يا محير قلبك وعينيك ليه تشكى والحق عليك اتمتع واضحك للميمه

الميه تروى العمطشان الدنيا بتضحك حواليك

# حنانك يا ربي

أنا بإيدى كويت قلبى وأحرمها نسعيم حبسى منيش لاقى حبيب جنبى وشفت اللى هواه يسبسى وكان الذنب مش ذنبى صبحت أبكى على قلبى وازداد حبى ضحيت مالى وشربت نار الأسيه

حنسانك به يسسا ربى وليه اجنسى على روحى قضيت عمرى وانا وحدى ولمسا الحسظ وافسانى ضنيت روحى بسكتانى وكان لى قلب عايش بيه ضحيت قلبى وضنيت حالى ورضيت بحكسم الزمسن قلبى مسلاه الشجسن قلبى مسلاه الشجسن

#### كلمات « حسين السيد »

# حوار غنائي

محسن : حكيم عيمون افهم في السعين

وافهــم كمان في رمــوش الــعين

أعمرف هواهمم ساكممن فين

واعرف دواهم بيجمي ممنين

قساسيت كستير منهم وقسربت كستير عنهم

يفي : اسمع يـا دكتــور . أنــا أعــرف إن الألم يجي مـــن

عصب الضرس لما الواحد ياكل حاجه ساقعه.

محسن : علشان تحرمي تاكلي جـــلاس

وتمدوبي في قلموب النماس

فیفی : وعرفت منین ؟

ما تعرفيش إني أقدر أقرا أفكارك

ومن عينيك أقمدر اقسول لك كل أسرارك

فیفی : حکیم روحانی حضرتك ..؟

طيب إقرالي اللي في قلبي واحكـــي لي عليــــه

محسن : اللي مكتوب فيه بيخوف ما اقدرش احكيه فيفي : بيخوف مين ؟ محسن : ..... بيخوفني . فيفي : انت كل حاجة تحشر نفسك فيها حتى قلبي محسن : يا ريتني صحيح أقــدر أكشف قلبك واسألم عاللي في بالي فيفي : تسأله عن إيه ؟ عايز أعرف **محسن** : إن كان مشغــول والاّ خـــالى فيفى : شيء ما يهمكش ..... مایهمنیسیش ازای ....!! محسن : فيفى : طب ما تعياطشي ...... محسن : عندى سؤال لو تسمحي . أقدر أقولهولك ؟ فيفى : . . . . . . . قوى محسن: فیه یا تری شخص یهمك شاغلك ومشغول به قلبك ؟ فيفي : ٠ ٠ ٠ ٠ ٠ ٠ ٠ ٠ محسن : والشخص ده موجود هنا ..؟ فيفى : . . . . . . . . . .

#### -101-

### أحبه مهما أشوف منه

أحبه مهما أشوف منه ومهما النياس قالت عنه أحبه ....

شغلنسی والأمــل خاننـــی وحیر كل أفكـــــــاری سقــانی الكــاس وراح فاتنــی لا انـــا سكــــران ولا داری بیظلم فی وبحبه

وقاسي علتي وبحبه

واحبه مهما أشوف منه ومهما الناس تقول عنه أحبه ....

شهسور وايام بيظلمنسي وقلبسي راضي بقليلسه

لا قسادر هسو يفهمنسسي ولا قادر أنا أحكسي لسه

جنیت علی قلبی وبحبـــه

وضحیت حبی وبجبـــه

واحبه مهما أشوف منه ومهما الناس قالت عنه

قابلنسی صدفه وقابلته وروحسی سلسمت قسبلی یاریتنسی کنت ما شفته ما نابنسی غیر ضیاع أملی واحبه مهما أشوف منه ومهما الناس قالت عنه أحبه ....

# حوار غنائي

محسن : حاقولك إيه عن أحوالي بعد اللي شفتيه بعنيك

آدی حیاتی وآدی حالی حاخبی إیه تانی علــیكِ

فیفی : وازای تعیش بالشکل ده ؟

عسن : ما اقدرش أعيش إلا كدا

فيفي : فاكر لما شفنا بعض أول مرة ..

محسن : أيوه فاكر .. لأمش فاكر شيء بالمرة

فيفى : كان حلم جميل

محسن : وادینی لسه عایش فیمه

فيفي : كان حلم جميــل

محسن : نسيته وانتِ كمان انسيــه

· فيفي : إنساه لوحدك أما أنـــا

عمري ما أنسى اللي مضي

عندى سوال

محسن : اتفضلي

فيفي : تسمح تجاوبني ؟

محسن : . . . . قـــوی

فيفي : تقدر تقرالي اللي في قلبي وتقوللي عليه ؟

محسن : مكتوب فيه واحد بيحبك وانت تحبيــــه

فيفي : والشخص ده موجود هنا ؟

محسن : . . . . . . بالطبـــع لأ

فيفى : . . . . . إنت كذاب

دایمٔـــا تنرفـــزنی کــــدا

محسن: ممكن يكون واقف عالباب

فیفی : دا شایفنی وانا شایفاه و فاهمنسی وانا فاهماه

من غير ما تقوللي عذرك أنا شفته

قلبك محتار بين صاحبك وخطيبته

لكن يا محسن أنا خايفه تكون بسببى مشألم محسن : بالعكس .. انا أشكرك على الألم ده .. انت فاكره

فسن : بالعكس .. أما اسكسرك على ألا لم ده .. أنت فا تسره

الجلاس اللي كلتيها .. مش كانت بــارده ؟

حياتى كانت كده ، وفاكره لما دابت من حرارة شفايفك ، حياتى من ساعتها بقت كده .

أنا مندهش ازاى كنت عايش في الدنيا مسن غير

ال مندهس اراى كست عايس ى الديب مس عير ما أعرف حرارة الألم .

ولقيتنسي عسايش بين قلسبين

اتعاهدوا من قلبسي الاتسنين

مارضیتش افرق بین أمسلین
واکون سبب فی عذاب حبیبین
ضحیت بغرامی ونصیبی
واختیرت آلامی وتعذییی
وآلامی هی اللی حاتفضل
مین حبی بعید الحرمیان
واللی میا سهرش ولا اتباً لم

محسن : الوداع يا فيـفى .

فيفي : الوداع يا محسن .

# الجلاس

يا جلاس الشوق فاض بي وطول يا ما دبت معاك وانسا مش دارى يــا مسبب نـارى مــن الأول دلــوقت بس طفــيت نـارى يما جلاس من ساعمة ما شفستك دبت في شفايفهـا بـغير مـنك دلوقت انسا اللي حانسوب عسنك واكشف عـــن حبـــي المداري يــا مسبب نـارى مــن الأول دلــوقت بس طفــيت نــارى اللي بيحب ومش طايل أنا عندى دواه الجلاس الجلاس ... واللي له بخت لكن مايل في إيديثه هناه الجلاس الجلاس ...

دانا یاما الشوق فاض بی وطول وانت اللی طفیت یا جلاس ناری یا مسبب ناری مسن الأول دلوقت أنا اللی حاخد تساری

## « كلمات مأمون الشناوى »

# انسَ الدنيا

انسَ الدنيـــا وريح بــالك واوع تفكــــر في اللي جــــرالك انس الدنيا يا لل دمروعك لحبايسبك قل لى ابتسامتك تبقسى لمين إوع الغرام يشغرل قلربك دا لسه فيــه في العمـــر سنين مین الهنای یبقی قصاده وتشغليه عنيه هموميه يــا عــاشق الليــل لسواده ف\_\_\_ایت لمین عشق نجوم\_\_\_ه ليه تشغل بالك مين يرحم حالك كل اللي احبيه حواليتيه مين زيسي في الدنيا اتهنيي

حتى النجوم ملك إيديسه
آدى النسعيم آدى الجنسة
دوق الجمسال واتمتسع بيسه
من قبل ما يدبسل ويسزول
واوع يفوت يسوم تحزن فيسه
واسهر ده بكره النوم حايطول
ليه تشغل بالك مين يرحم حالك

رقم الإيداع : ۳۹۰۲ / ۸۸ الترقيم الدولى : ۸ ـــ ۲۰۹ ـــ ۱۱ ـــ ۹۷۷



rted by Tiff Combine - (no stamps are applied by registered version

